

大集賢護經

上
罪

C40
4514
36

240-4574

了翁在請大藏及石
家書置之武州紫雲山
我微笑塔院庫府中永
為學者不敢許出院內
當山二世鐵牛機謹誌



B 64853

大方廣大集賢護經卷第一

隋天竺三藏闍那崛多及笈多等譯

思惟品第二之一

如是我聞一時佛在王舍城迦蘭陀竹園精舍與大
比丘眾五百人俱皆是阿羅漢諸漏已盡無復煩惱
咸得自在心善解脫慧善解脫調伏一切猶如大龍
所作已辦眾行具備棄捨重擔不受後生行於平等
獲真已利安住正教得到彼岸惟除長老阿難一人
爾時復有五百諸比丘於晨朝時各從住處詣世尊
所恭敬合掌頂禮佛足退坐一面爾時尊者舍利弗

經

大方廣大集賢護經卷第一

尊者大目連在舍衛城夏安居已亦與五百諸比丘
俱次第遊行城邑聚落至王舍城入迦蘭陀竹園精
舍詣世尊所到已恭敬頂禮佛足退坐一面爾時世
尊以神通力放大威光令彼諸國城邑聚落一切所
有諸比丘衆咸各來詣王舍大城入迦蘭陀竹園精
舍至世尊所恭敬合掌頂禮佛足退坐一面爾時迦
蘭陀竹園精舍有百千數諸比丘等承佛威光皆已
雲集至世尊所恭敬合掌頂禮佛足退坐一面爾時
復有彼摩訶波闍波提比丘尼亦承世尊威神力故
亦與二萬比丘尼俱悉皆大集入迦蘭陀竹園精舍

詣世尊所恭敬合掌頂禮佛足退坐一面爾時王舍
大城有優婆塞名曰賢護爲衆上首亦與五百優婆
塞俱受持五戒具足威儀是大菩薩久已住於阿耨
多羅三藐三菩提行本願力故常隨世尊樂聞正法
恒勤精進爲滿一切助道法故於朝旦時承佛威神
從本住處入迦蘭陀竹園精舍至世尊所恭敬合掌
頂禮佛足退坐一面爾時毗耶離大城有一離車子
名曰寶生爲衆上首亦與二萬八千諸離車俱於晨
朝時承佛神力皆自彼城發來入此迦蘭陀園至如
來所恭敬合掌頂禮佛足退坐一面爾時瞻婆城有

一長者子名曰星藏爲衆上首亦與二萬八千長者子俱於晨朝時承佛神力自瞻婆城發來入此迦蘭陀園至世尊所恭敬合掌頂禮佛足退坐一面爾時復有一摩那婆名那羅達多爲衆上首亦與二萬八千人俱於晨朝時自本住處發來入此迦蘭陀園詣世尊所恭敬合掌頂禮佛足退坐一面爾時舍衛國復有長者名大善商主并彼給孤獨長者爲衆上首亦與二萬八千人俱自彼舍衛國詣王舍城入迦蘭陀園至世尊所恭敬合掌頂禮佛足退坐一面爾時王舍大城復有長者名曰水天爲最上首亦與二萬

八千人從本住處發來入此迦蘭陀園詣世尊所恭敬合掌頂禮佛足退坐一面爾時摩伽陀國主韋提希子阿闍世王亦與百千諸眷屬俱於晨朝時亦來入此迦蘭陀園詣世尊所頂禮佛足退坐一面爾時復有四大天王及天帝釋乃至欲界一切天衆各與無量百千億那由他眷屬天衆俱亦於晨朝悉來入此迦蘭陀園至如來所頂禮佛足退坐一面爾時復有娑婆世界主大梵天王亦與無量百千億那由他眷屬天衆俱於晨朝時悉入迦蘭陀園至如來所頂禮佛足退坐一面爾時復有自在天王亦與無量

百千淨居諸天衆俱於晨朝時悉入迦蘭陀園頂禮
佛足退坐一面爾時復有四阿修羅王各與無量百
千眷屬阿修羅衆俱亦於晨朝入迦蘭陀園詣如來
所頂禮佛足退坐一面爾時復有難陀龍王及跋難
陀龍王各與無量百千眷屬諸龍衆俱亦於晨朝入
迦蘭陀園詣如來所頂禮佛足退坐一面爾時復有
娑伽羅龍王阿那婆達多龍王及摩那斯龍王伊跋
羅龍王等各與無量百千眷屬諸龍衆俱亦於晨朝
入迦蘭陀園詣如來所頂禮佛足退坐一面爾時此
三千大千世界一切諸比丘比丘尼優婆塞優婆夷

及以一切天龍夜叉乾闥婆阿修羅迦樓羅緊那羅
摩睺羅伽乃至人非人及諸王等信如來者爲聽法
故一切皆集迦蘭陀園詣如來所頂禮佛足各坐一
面爾時迦蘭陀園其地弘廣如此三千大千世界所
有地方大衆充滿無空缺處若杖頭許而不徧者如
是上至有頂下逮梵宮所有一切大威德神通諸天
大衆乃至一切諸龍夜叉乾闥婆阿修羅迦樓羅緊
那羅摩睺羅伽人非人等皆來集會爾時賢護菩薩
摩訶薩卽從座起偏袒右肩右膝著地合掌向佛白
佛言世尊我於今者欲得諮問如來應供等正覺心

中所疑不審世尊見垂聽不爾時世尊復告賢護菩薩言賢護如來世尊隨汝所疑恣汝所問爲汝宣釋令汝歡喜時彼賢護菩薩旣蒙聽許復白佛言世尊菩薩摩訶薩具足成就何等三昧而能得彼大功德聚云何得入多聞大海獲智慧藏問無疑惑故云何復得無意戒聚不成就於阿耨多羅三藐三菩提無退減故復云何得不生愚癡邪見空處故云何當得宿命智遍知去來故云何當得不離奉見諸佛世尊聽聞正法乃至夢中故云何當得殊特端正上妙色身具足威儀衆生樂見故云何當得常生大姓之

家尊貴之位見者恭敬故云何復得父母兄弟宗親眷屬及以知識左右圍遶恒無別離故云何當得廣達博通所爲殊異亦終無缺減於阿耨多羅三藐三菩提心故云何當得正念正行節度不移心知足故云何當得常生慙愧遠離恥辱故云何當得正智謙恭降伏我慢故云何當得策勤精進遠離懈怠故云何當得大慈大悲大喜大捨平等與樂故云何當得聞說甚深真空無相無願法時一切無有驚怖退沒故云何當得不樂懶惰攝受正法故云何當得智慧通達明了一切無與等者故云何當得於一切佛刹

隨意得生故云何當得不爲一切外道所摧壞故云何當得如海能受納衆問疑釋難無滅無盡故云何當得如月滿白淨法具足故云何當得如日初出破諸暗冥故云何當得如燈炬光明照了故云何當得如虛空性無有罣礙故云何當得無所住著心如虛空故云何當得如金剛穿徹通達一切法故云何當得如須彌山不可動搖故云何當得如門闢一切正住故云何當得如猫狗獸等心業成就故云何當得無爲一切諸法中故云何當得如飛鳥隨意而去故云何當得摧折憍慢如旃陀羅子故云何當得住阿

蘭若如諸獸獼猴等不樂城邑聚落一切出家在家不相參亂故云何當得統領大衆教詔導示故云何當得不樂生一切衆生中不動於一切衆生故云何當得不爲一切外道降伏天魔惑亂故云何當得大辯才於一切法決了知故云何當得於一切佛法不隨他行故云何當得大堅固信無可毀壞故云何當得大慈力信不可動故云何當得深入信無所行故云何當得潤澤信於一切法中多歡喜故云何當得最勝信供養承事一切諸佛無厭足故云何當得種種入信種諸善根故云何當得真妙信增長無虛僞

經 一
大正新編大藏經卷一
九
行故云何當得淨喜信除滅一切嫉妬垢故云何當
得清淨信得一切種智光明故云何當得喜樂行信
除滅諸蓋障惡故云何當得智喜信攝受諸佛境界
故云何當得莊嚴行信勝一切世間瓔珞莊嚴佛國
清淨成就故云何當得清淨戒行永滅一切聲聞辟
支佛心故云何當得莊嚴大誓一切所作皆究竟故
云何當得爲一切衆生中上首欲行諸善法故云何
當得無有疲倦爲欲教授一切菩薩所學諸波羅蜜
故云何當得不退轉多求一切佛法故云何當得不
可壞不爲一切外道邪師所破故云何當得深信一

切諸佛不捨此念常見諸佛故云何當得如父想紹
隆一切佛法故云何當得佛力加持於一切佛法光
明中生故云何當得無障礙一切佛法悉現在前故
云何當得如幻人於一切法無思念故云何當得如
化者觀一切法無生滅故云何當得如夢觀察三世
無來去故云何當得如鏡像一切世界斯現身中故
云何當得如響聲一切法無作無爲因緣生故云何
當得如形影於一切生法自無心取捨故云何當得
空無所有遠離一切諸物想故云何當得無相觀一
切法無有二故云何當得法界邊際菩提心無限量

故云何當得不起著一切世界性無分別故云何當得無礙行遍遊一切諸佛刹中故云何當得諸陀羅尼聞一知萬善達一切文字分別說故云何當得如諸法師善知一切佛法故云何當得一切諸佛所護念一切佛威力加持故云何當得雄猛不怯弱出聲如大牛王及大師子王步故云何當得無畏令一切世間歡喜故云何當得無疑惑於一切佛平等無二故云何當得通達如如滅除疑惑不著諸法故云何當得證深法界善能解釋所問義故云何當得師利益他具足大慈故云何當得滅除懶惰恒樂說法故

云何當得如法住不捨一切衆生故云何當得不諂曲性淳直故云何當得如眼目爲一切世間燈明故云何當得不可輕蔑勝出一切三界故云何當得無諍論如教說行故云何當得無艱難行無住著故云何當得知於實際不分別諸法故云何當得說一切語言智令諸衆生住於大乘故云何當得至無畏處遠離恐怖永無一切毛豎等事故云何當得知佛方便說善達一切修多羅等故云何當得不空生世間恒入一切衆中獲利故云何當得爲一切智首於一切世間應受供養大名聞故云何當得無邊讚歎功

德爲一切衆生福田故云何當得大歡喜踊躍無量
常在諸如來師子座下故云何當得勝上辯才能問
一切佛法故云何當得意不怯弱辯才於一切大衆
中無怖畏故云何當得一切論議辯如師子王降伏
一切外道攝受諸異論師故云何當得不壞本誓莊
嚴欲摧一切邪異朋黨故云何當得善巧說法常處
師子座一切諸佛印可故云何當得遠離一切世間
無義語言以通達一切正教故云何當得深愛一切
諸佛法於諸如來生處行故云何當得樂欲眞法知
諸如來不生故云何當得不懈慢善承事知識故云

何當得不染著遊行一切世界故云何當得願行具
足爲教化一切衆生故云何當得如珊瑚得諸相故
云何當得如虛空一切法無得相故云何當得如菩
薩不斷佛種故云何當得不休息行諸菩薩道未曾
遠離大乘故云何當得著大鎧甲諸佛廣大戒中決
定住故云何當得一切諸佛所讚灌頂住於諸如來
十力地中故云何當得一切所想通達一切諸法行
故云何當得一切算數巧方便知故云何當得善知
一切成壞遠離一切障礙行故云何當得一切不住
行不取不捨故云何當得一切大施主能施無悔故

云何當得人諸法海能施勝上法寶藏故云何當得一切世間行能捨世間諸相故云何當得廣大神通隨順諸佛神通滿足歡喜故云何當得一刹那時間行即能徧至一切諸佛前故復云何當得住此佛刹徧見一切十方諸佛聽聞正法供養衆僧非但未得出世六通而實未得世間五通而亦未捨此世界身亦無生彼諸佛國土惟住此土見餘世界諸佛世尊悉聞諸佛所宣正法一切聽受如說修行世尊譬如今時聖者阿難於世尊前親聞法已皆悉受持如說奉行彼諸菩薩身居此土不至彼界而能徧觀諸佛

世尊聽聞法已悉能受持如說修行亦復如是從是已後一切生處常不遠離諸佛世尊聽聞正法乃至夢中咸若斯也爾時世尊告賢護菩薩摩訶薩言善哉善哉賢護汝今乃能請問如來如是妙義汝爲利益一切世間諸衆生故亦爲安樂諸衆生故復爲憐愍諸天人故復爲攝受未來世中諸菩薩故賢護而汝往昔已曾供養無量諸佛種諸善根聽聞正法受持正法愛樂正法敬重正法汝今但以摩訶迦葉教化行故少欲知足恒樂閑靜阿蘭若處或居塚間或在樹下亦露地坐常坐不臥一敷不移受乞食法一

食不再或一坐食或惟一搏惟畜三衣及糞掃衣讚
歎頭陀勸請諸菩薩教菩薩行法令諸菩薩喜訶責
諸菩薩教示諸菩薩成就諸菩薩能爲利益行大慈
悲於諸衆生平等心咸得自在到於彼岸隨意得
見一切諸佛發廣大願行深妙行樂一切智菩提梁
柱善能隨順如來種性發菩提心猶如金剛通達世
間衆生所念廣大妙行不可校算不可稱量常在一
切諸佛目前賢護於汝功德中未說少分也賢護今
有菩薩三昧名曰思惟諸佛現前三昧若有菩薩具
足修集如是三昧當得成就如上所問諸功德等賢

護當知更有無量無邊勝上功德說不可盡爾時賢
護菩薩復白佛言善哉世尊惟願說此菩薩念一切
佛現前三昧令此世間天人梵魔沙門婆羅門諸龍
夜叉乾闥婆阿修羅迦樓羅緊那羅摩睺羅伽人非
人等多獲利益多受安樂故亦令當來無量衆生多
得利益多受安樂故又爲未來諸菩薩輩作大光明
承佛威力故又願現在未來諸菩薩等普得闡此念
一切佛現前三昧彼既聞已皆悉受持既受持已一
切皆當如實修學如教奉行既學行已當令得不退
轉於阿耨多羅三藐三菩提現前卽能具足成就如

是功德及餘勝上功德等爾時世尊復告賢護菩薩
言賢護如法言者汝當諦聽善思念之吾今爲汝分
別解說賢護復言善哉世尊我深樂聞如來所說佛
復告言賢護云何名爲菩薩思惟一切諸佛現前三
昧若有菩薩具足成就此三昧者卽獲如前諸功德
事亦得其餘殊異功德所謂心念諸佛皆現在前其
心不亂不捨作業求勝上智勇猛精勤荷負重擔度
脫衆生承事供給諸善知識常修空寂廣大思惟親
善知識滅除諸蓋遠離惡友息世語言塞諸根門初
中後夜減損睡眠不貪衣服食飲湯藥堂房屋宇牀

座衆具恒樂空閑住呵蘭若不愛已身不重我命不
著形色不縱其心修以慈心熏以悲行一切時喜常
行捨心破壞煩惱成就諸禪於中思惟不著滋味觀
察色想惟得空心不亂正念不取諸陰不著諸人不
思諸界不貪生處調伏慢高不妒他財爲諸世間多
作饒益於諸衆生起平等心又於衆生生父母想亦
於衆生所作一子心一切法中無有諍想雖念持戒
而不執著常在禪定亦無耽染好樂多聞不起分別
戒聚不缺定聚不動智聚不妄諸法無疑下背諸佛
不謗正法不壞衆僧不好乖離親近衆聖遠離愚癡

不志求出世雖聞語言意不樂聽亦不耽著世間六
味習近熏修五解脫法除滅十惡念修十善斷滅衆
生九種惱處心常不離九想觀門常思棄捐八種懈
怠一心修習八大人覺不著禪味不恃多聞摧伏我
慢一心聽受求法慇重修道證知憐愍衆生離我分
別求壽命想畢竟難得觀察諸陰無有物想不住涅
槃不著生死諸行煩惱輪發大恐怖想諸陰怨家想
諸入空宅想諸界毒蛇想三界衰惱想涅槃利安想
觀諸欲惡猶如唾洩深樂出家不違佛教於衆生所
勸行功德於諸世界無復染心見一切佛皆悉現前

受一切身皆若幻夢一切諸相觀察滅除思惟往來
不見三世於信清淨深信真妙念一切佛三世平等
無有動轉而能持諸善根一切諸佛三昧自在終不
染著諸佛相身於一切法皆悉平等不與一切世間
共諍所相應作不相違背通達甚深十二因緣窮盡
一切如來道地得勝上忍入真法界見衆生界性無
生滅見涅槃界本來現前慧眼清淨觀法無二彼菩
提心無中無邊一切諸佛體無差異入於無礙清淨
智門明見菩提自然覺智於善知識起諸佛想於菩
薩所不念乖離已於生死破壞魔軍一切衆事皆悉

如化見諸如來如鏡中像應當求彼菩提之心諸波
羅蜜莫不平等實際無盡集佛功德賢護是爲菩薩
思惟諸佛現前三昧若有菩薩摩訶薩欲具成就如
是三昧當先成就如是功德賢護當知更有無量功
德然亦緣此三昧而生佛復告賢護言是中何等三
昧能生如是諸功德行所謂菩薩思惟諸佛現前三
昧能生如是諸功德法復次賢護云何名爲菩薩思
惟諸佛現前三昧也賢護若有比丘比丘尼優婆塞
優婆夷清淨持戒具足諸行獨處空閑如是思惟於
一切處隨何方所卽若西方阿彌陀如來應供等正

覺是人爾時如所聞已卽應自作如是想念如我所
聞彼阿彌陀如來應供等正覺今在西方經途去此
過百千億諸佛國土彼有世界名曰安樂如是如來
今現在彼爲諸菩薩周匝圍遶處大衆中說法教化
然而是人依所聞故繫念思惟觀察不已了了分明
終獲見彼阿彌陀如來應供等正覺也復次賢護譬
如世間若男若女於睡夢中見種種事所謂金銀衆
寶珍財倉庫或見朋友諸知識輩或見覺時心不樂
者是人夢中所對境界或違或順或憂或喜有時語
言歡欣極樂有時慄慄感盡意悲哀是人寤已思惟憶

念如夢所見爲他廣宣追念夢中便生憂喜如是賢
護彼善男子善女人端坐繫念專心想彼阿彌陀如
來應供等正覺如是相好如是威儀如是大衆如是
說法如聞繫念一心相續次第不亂或經一日或復
一夜如是或至七日七夜如先所聞具足念故是人
必覩阿彌陀如來應供等正覺也若於晝時不能見
者若於夜分或睡夢中阿彌陀佛必當現也復次賢
護譬如世間若男若女遠行他國於睡夢中見本居
家時實不知爲晝爲夜而亦不知爲內爲外是人爾
時所有眼根牆壁石山終不能障乃至幽冥黑暗亦

不爲礙也賢護菩薩摩訶薩心無障礙亦復如是當
正念時於彼所有佛刹中間凡是一切須彌山王及
鐵圍山大鐵圍山乃至自餘諸黑山等不能與此眼
根爲障而亦不能覆蔽此心然人者其實未得天眼
能見彼佛亦無天耳聞彼法音復非神通徃彼世界
又亦不於此世界沒生彼佛前而實但在此世界中
積念熏修久觀明利故終得覩彼阿彌陀如來應等
正覺僧衆圍遶菩薩會中或見自身在彼聽法聞已
憶念受持修行或時復得恭敬禮拜尊承供養彼阿
彌陀如來應等正覺已是人然後起此三昧其出觀

已次第思惟如所見聞爲他廣說復次賢護如此摩
伽陀國有三丈夫其第一者聞毗耶離城有一姪女
名須摩那彼第二人聞有姪女名菴羅波離彼第三
人聞有姪女名蓮華色彼既聞已各設方便繫意勤
求無時暫廢然彼三人實未曾覩如是諸女直以遥
聞卽興欲心專念不息後因夢已在王舍城與彼女
人共行欲事欲事旣成求心亦息希望旣滿遂便覺
寤寤已追念夢中所行如所聞見如所證知如是憶
念來詣汝所具爲汝說者汝應爲彼方便說法隨順
教化令其得住不退轉地究竟成就阿耨多羅三藐

三菩提彼於當來必得成佛號曰善覺如來應供等
正覺明行足善逝世間解無上士調御丈夫天人師
佛世尊如是三人旣得忍已還復憶念往昔諸事了
了分明也賢護彼善男子善女人等若欲成就菩薩
摩訶薩思惟一切諸佛現前三昧亦復如是其身常
住此世界中暫得聞彼阿彌陀如來應供等正覺名
號而能繫心相續思惟次第不亂分明覩彼阿彌陀
佛是爲菩薩思惟具足成就諸佛現前三昧因此三
昧得見佛故遂請問彼阿彌陀佛言世尊諸菩薩等
成就何法而得生此佛刹中耶爾時阿彌陀佛語是

菩薩言若人發心求生此者常當繫心正念相續阿彌陀佛便得生也既得生已世尊於是知彼心故亦卽念彼彼方得見佛世尊耳賢護時彼阿彌陀如來應等正覺告彼人言諸善男子汝當正念精勤修習發廣大心必生此也賢護時彼菩薩復白阿彌陀佛言世尊是中云何念佛世尊精勤修習發廣大心得生此刹耶賢護時彼阿彌陀佛復告彼言諸善男子若汝今欲正念佛者當如是念今者阿彌陀如來應正覺明行足善逝世間解無上士調御丈夫天人師佛世尊具有如是三十二相八十隨形好身色光明

如融金聚具足成就衆寶輦放大光明坐師子座沙門衆中說如斯法其所說者謂一切法本來不壞亦無壞者如不壞色乃至不壞識等諸陰故又如不壞地乃至不壞風等諸大故又不壞色乃至不壞觸等諸入故又不壞梵乃至不壞一切世主等如是乃至不念彼如來亦不得彼如來彼作如是念如來已如是次第得空三昧善男子是名正念諸佛現前三昧也賢護爾時彼菩薩從三昧起已來詣汝所說此三昧相者汝時卽應爲彼說法隨順教化令於阿耨多羅三藐三菩提得不退轉

大方等集賢護經卷第一

音釋

摩那婆

梵語也此云淨持亦云少年亦云仁童子等

遠離

遠于願切離力智切

可亥切

校

古孝切計也

慘

七感切愁也

寤

五故切寐覺也

輦

輦力展切

舉羊諸切

浙江嘉興府楞嚴寺般若堂庚子年餘費刻此賢護經第一卷計六千七百六十字

該銀三兩九錢二分

順治十七年 月 日 徑山比丘徽教印開識

大方等大集賢護經卷第二

隋天竺三藏闍那崛多及笈多等譯

思惟品第一之一

賢護我時則亦授彼佛記是人當來必得成佛號曰德光明如來應供等正覺乃至佛世尊賢護是中三昧誰當證知今我弟子摩訶迦葉帝釋德菩薩善德天子及餘無量諸菩薩輩咸已修得此三昧者是為證云何證所謂空三昧也賢護我念往昔有佛世尊號須波日時有一人行值曠野飢渴困苦遂即睡眠夢中具得諸種上妙美食食之既飽無復飢虛從是

寤已還復飢渴是人因此卽自思惟如是諸法皆空
無實猶夢所見本自非真如是觀時悟無生忍得不
退轉於阿耨多羅三藐三菩提如是賢護有諸菩薩
若在家若出家聞有諸佛隨何方所卽向彼方至心
頂禮心中渴仰欲見彼佛故作如是專精思惟復應
當觀如是色相亦卽作彼虛空之想而彼成就虛空
想已得住如是正思惟中住思惟已得見彼佛光明
清徹如淨瑠璃其形端正如真金柱如是念者彼見
如來亦復如是復次賢護譬如有人忽從本國至於
他方雖在他方而常追憶本所生處曾如是見亦如

是聞如是憶念如是了知久追憶故於睡夢中明見
自身在本生處遊從見聞如前所更是人後時向諸
眷屬具論夢中所見之事我如是見我如是聞我如
是營爲如是獲得如是賢護有諸菩薩若在家若出
家若從他聞有佛世尊隨何方所卽向彼方至心頂
禮欲見彼佛正念不亂應念卽見彼佛形像或如瑠
璃或純金色亦復如是復次賢護譬如比丘修不淨
觀見新死屍形色始變或青或黃或黑或赤或時脛
脹或已爛壞膿血俱流蟲獸食噉肉盡骨白其色如
珂如是乃至觀骨離散而彼骨散無所從來亦無所

去惟心所作還見自心如賢護若諸菩薩欲得成就彼念諸佛現前三昧隨何方所先念欲見彼佛世尊隨所念處卽見如來何以故因緣三昧得見如來得見彼佛有三因緣何者爲三一者緣此三昧二者彼佛加持三者自善根熟具足如是三因緣故卽得明見彼諸如來應供等正覺亦復如是復次賢護如人盛壯容貌端嚴欲觀己形美惡好醜卽便取器盛彼清油或持淨水或取水精或執明鏡用是四物觀己面像善惡好醜顯現分明賢護於意云何彼所見像於此油水水精明鏡四處現時是爲先有耶賢護

答言不也曰是豈本無耶答言不也 是爲在內耶
答言不也曰是豈在外耶答言不也世尊惟彼油水水精明鏡諸物清明無濁無滓其形在前彼像隨現而彼現像不從四物出亦非餘處來非自然有非人造作當知彼像無所從來亦無所去無生無滅無有住所時彼賢護如是答已佛言賢護如是如是如汝所說諸物清淨彼色明朗影像自現不用多功菩薩亦爾一心善思見諸如來見已卽住住已問義解釋歡喜卽復思惟今此佛者從何所來而我是身復從何出觀彼如來竟無來處及以去處我身亦爾本無

出趣豈有轉還彼復應作如是思惟今此三界惟是
心有何以故隨彼心念還自見心今我從心見佛我
心作佛我心是佛我心是如來我心是我身我心見
佛心不知心心不見心心有想念則成生死心無想
念卽是涅槃諸法不真思想緣起所思旣滅能想亦
空賢護當知諸菩薩等因此三昧證大菩提

三昧行品第二

爾時世尊復告賢護菩薩摩訶薩言賢護若諸菩薩
摩訶薩具行四法則能得是現前三昧何等爲四一
者不壞信心二者不破精進三者智慧殊勝四者近

善知識賢護是爲菩薩具足四法則得成就現前三
昧也賢護菩薩摩訶薩復有四法能具足行則能成
就現前三昧何等爲四一者乃至於剎那時無衆生
想二者於二月內不暫睡眠三者二月經行惟除便
利四者若於食時布施以法不求名利無望報心賢
護是爲菩薩具足四法則得成就現前三昧也賢護
菩薩摩訶薩復有四法能具足行則得成就現前三
昧何等爲四一者勸他見佛二者教人聽法三者心
無嫉妒四者勸他發菩提心賢護是爲菩薩具足四
法則得成就現前三昧也賢護菩薩摩訶薩復有四

法成就三昧何等爲四一者造佛形像勸行供養二
者書寫是經令他讀誦三者慢法衆生教令發心四
者護持正法令得久住賢護是爲菩薩具足四法則
得成就現前三昧也爾時世尊爲重明此義而說偈

曰

汝等當住佛法中

勿藏正言及我法

念勤精進除睡蓋

三月不坐惟經行

食時廣設而施他

宣揚諸佛無比法

不求名聞及利養

無所著故得此禪

莫生嫉妬及瞋恚

當思解脫諸欲心

樂此三昧求住者

勤念無懈爾乃得

金色百福莊嚴相

端正圓滿若華榮

世間樂見光明體

常覩諸佛在現前

往古諸佛及將來

現在一切人中勝

汝等一心恭敬禮

亦常專念修供養

汝若供養彼諸佛

應以華香及塗香

惠施美食起淨心

證此三昧殊非難

諸佛塔前作衆樂

螺鼓鈺鐸諸妙音

歡喜踊躍難稱量

必當成就此三昧

勸造尊像無比身

彩畫莊嚴具足相

金色光大無瑕垢
證此三昧良非難
各各常念修法施
淨持禁戒及多聞
精勤勇猛除懈怠
得此三昧終不久
不應他所懷毒心
亦捨世間諸欲事
常以慈悲念一切
三昧豈遠在現前
於法師所常隨喜
尊重恭敬等如來
莫生輕慢與慳貪
喜心供養除嫉妬
無量諸佛共稱揚
汝但勤求自當得
世尊鄭重演說斯
爲修如是妙法故

見佛品第三

爾時世尊復告賢護菩薩言賢護若諸菩薩摩訶薩
欲得成就此三昧者當應於彼說法師所生諸佛想
起尊重心勿生僞慢乃至無有諍競違逆不順心故
然後於此勝三昧中精勤修學方能剋證賢護若人
於彼說法法師所或比丘所起不善心苟違異心諍
競之心故陵辱心諸不淨心乃至不生如諸佛想如
是菩薩假令修行終不能證如是妙定若得證者無
有是處賢護譬如清淨虛空無諸雲翳有明目人於
靜夜時仰觀空中無量星宿區別方所形色各異了
了分明如是賢護菩薩摩訶薩思惟觀彼法性虛空

以想成故見諸如來其事若此然彼菩薩觀東方時
多見諸佛多見百佛多見千佛多見百千佛多見億
佛多見億百千佛多見億百千那由他佛不假作意
自然現前而彼菩薩既作如是觀東方已次觀南方
及西北方四維上下十方世界各多見佛所謂多見
百佛多見千佛多見百千佛多見億佛多見億百千
佛多見億百千那由他佛不假功用皆現在前復次
賢護如彼阿彌陀如來應供等正覺其世界中諸菩
薩等生彼國者於初一日觀察東方多見諸佛多見
百佛乃至多見百千億那由他佛已然後於第二日

觀察南方如是乃至十方事皆若此如是賢護若菩
薩摩訶薩成就菩薩思惟諸佛現前三昧如是菩薩
於自土中觀察十方多見諸佛多見百佛乃至多見
百千億那由他諸佛也復次賢護如諸如來成就佛
眼如是見已於一切處悉如是知悉如是見如是賢
護若菩薩摩訶薩亦既成就菩薩思惟一切諸佛現
前三昧已自然滿彼檀波羅蜜尸波羅蜜羸提波羅
蜜毘梨耶波羅蜜禪波羅蜜般若波羅蜜乃至滿彼
一切菩薩諸功德等爾時世尊爲重明此義以偈頌

曰

猶如靜夜除雲霧
有明眼者仰觀空
見彼衆星過百千
晝念明了亦無失
菩薩如是得定已
多見無量億千佛
復於起斯三昧後
還爲大衆演最尊
如我佛眼清淨故
無有障礙見世間
是諸佛子菩薩眼
出此三昧最勝觀
以無相思想如來
而見十方諸等覺
破除惱毒及諸想
汝聽菩薩妙功德
若聽彼法清涼心
能入空寂無畏處
如我當今說斯法
爲令衆生證菩提

如彼安樂諸菩薩
多見無量佛世尊
菩薩如是入思惟
亦見百千多調御
如此比丘惟阿難
一聞我說悉能受
菩薩如是得三昧
聽一切法能總持
成就信慙具三昧
悉捨一切世語言
常以慈心惠他說
要當到斯寂靜地

正信品第四

爾時世尊復告賢護菩薩言賢護若諸菩薩摩訶薩
爲求如是三昧寶故當應勇猛發勤精進自然速能
入此三昧也賢護譬如有人乘御大船入於大海恣

意載滿衆妙珍寶已過一切諸大難處垂至此岸未幾之間船忽破壞衆寶沉沒當爾之時閻浮提人發大叫聲生大悲苦以失如是無價寶故賢護有善男子善女人亦復如是耳聞如斯勝三昧寶不能書寫讀誦受持復不能思惟如法而住賢護當知爾時一切世間諸天神等亦應如是發大叫呼生大悲惱作如是言是諸衆生深可憐愍云何於此諸佛世尊勝三昧寶一切諸佛之所稱揚一切諸佛之所印可一切諸佛之所教誡一切諸佛最上功德具足成就圓滿無缺菩薩聞已當應勤求反更遠離不肯書寫不

樂讀誦不能受持解釋義理不能思惟如法而住如是放逸懈怠衆生未來必當受大損減賢護何等名爲衆生損減所謂於如是三昧寶中聞已遠離不能書寫讀誦受持不能解說思惟義理不如法住專念修行喪滅功德是爲損減賢護是懈怠人惡衆生輩於斯法中得利益者無有是處復次賢護譬如有人持赤栴檀示愚癡人而彼癡人以愚癡故於赤檀香起臭穢想時主智人賣檀香者告愚人曰汝今不應於妙栴檀生臭惡想何以故是檀最精香氣第一汝今何故反爲臭惡若不信者應先嗅嘗爲臭爲香又

汝眼明亦應以自觀察是檀光色文彩爲瘦爲肥爲善爲惡然彼愚者雖聞智人如是語言種種稱讚以愚癡故轉生憎惡以手捻鼻不用嗅聞掩閉其目不肯觀視如是賢護當來之世有惡比丘憎惡是經其事亦爾彼惡人輩不知修習身戒心慧愚癡無智猶如白羊頑駮狠弊彼諸惡人又薄福故雖復得聞如是妙典正念諸佛現前三昧不用書寫不能讀誦不能受持不能思惟不能爲人宣揚廣說又亦不能廣生隨喜云何能得如說修行若彼惡人能說行者無有是處又復聞已更興誹謗都無信心謂爲真實雖

聞多說終無開解復作是言若斯法者但爲戲論故神異其事又爲熾盛言教故過飾其詞誘誑世間造斯經典豈得方比聖者阿難諸比丘輩現在世時宣說如是諸修多羅也又於異時發如是言此修多羅非佛所說是乃惡人自造文章妄言經耳賢護當知如斯惡人長夜遠離如是微妙無上大寶如彼癡人見妙香已掩眼塞鼻不用見聞如是賢護彼愚惡輩聞此妙經三昧寶已不欲書寫不樂讀誦不念受持不能宣說所謂無心親近不願聞故復次賢護譬如有人賣摩尼寶有愚癡人見彼寶已卽便問言仁者

經
斯寶其價云何寶主答言汝今當知是寶精勝世間
所無非可造次以世價論也吾今且說此寶功能威
德力用粗爲約耳卿若欲知此摩尼寶光明所照近
遠若干卿今若須當以真金布滿斯地爾乃相與彼
愚癡人聞是語已便大嗤笑種種皆毀是摩尼寶竟
不酬價如是賢護彼未來世諸惡比丘聞此經中勝
三昧寶無有信心多生嗤笑更興誹謗其事亦爾或
有比丘信根深厚慧根明利已於過去諸如來所親
近承事聽聞正法如教修行種諸善根彼等聞此菩
薩念佛現前三昧卽能讀誦思惟義理爲人廣說能

多利益一切世間所謂廣宣流布生大信心發大智
慧成就純直具足威儀常行慙愧怖畏衆罪修持禁
戒不受諸欲信甚深法能多受聞得深智忍常行慈
悲然而斯等信根深固行是三昧得三昧已遊諸方
國爲他廣說解釋義理常作是願今此菩薩念佛三
昧甚深經典廣行流布常住於世或有衆生善根微
薄福德少過去未曾親近諸佛供養承事聽聞正
法但爲我慢所降嫉妬所導利養所覆名聞所牽廣
行放逸不持戒善常樂亂心不修禪定遠離經教不
求多聞未遇善師惟逢惡友斯人如是聞此三昧誹

謗輕毀無一信心謂爲不實志性頑愚意無開解復作是言如斯經典非佛所說乃是世間鈍根比丘愚癡邪見自作文章嚴飾詞句若處衆中應如是說亦如是教汝諸衆生當知今此修多羅典非佛所說如是癡人不知親近諸佛世尊不種善根不修供養習近惡友多作衆惡當知是人遠離無上深妙法寶永失無上最勝法利也佛告賢護吾復語汝我今現在一切世間梵魔沙門婆羅門及諸天人阿修羅等諸大衆前宣說如是妙三昧時若彼善男子善女人聞已隨喜讀誦受持念佛三昧思惟信解最以爲真發

如是言是爲真實諸佛說者當知彼人所獲福聚不可思議賢護若復有諸善男子善女人持滿三千大千世界種種珍寶以用供養一切諸佛如來應供等正覺所得功德雖爲廣大然望持經所獲福聚百千萬分不及其一乃至更以無量無邊阿僧祇諸福德聚亦不及一也爾時世尊爲重明此義而說偈曰
邪曲愚惑人 放逸根不熟 惡友之所壞
無有正信心 破戒造衆罪 深著於我慢
彼各言此經 非是諸佛說 此諸修多羅
非是法王教 彼輩自意言 我何能說此

若見大調御

世尊放光明

我爲彼宣說

彼亦能傳說

其或於此經

聞已生歡喜

斯人無疑網

不言非佛說

如有戒清淨

所見能了知

敬法起重心

我爲此陳說

若以三千寶

持奉諸如來

爲求大菩提

其福不可說

若有諸比丘

說佛所歎定

聞者生信心

此福過於彼

受持品第五

爾時世尊復告賢護菩薩言賢護此衆有人今在我前親聞我說如是三昧於我滅後其所生處還復得

聞是三昧寶雖聞不信誹謗毀皆遠離善友隨逐惡人賢護復有一人於善人所聞是三昧深妙經典尚不生信不以爲實不能開解況惡人處聞是經典寧能生信而復開解何以故賢護諸佛如來所言難信諸佛世尊智慧難知故賢護若當成就如是三昧然後乃能於當來世與諸衆生增長佛法復次賢護有諸菩薩摩訶薩若在家若出家聞此三昧不怖不驚不悔不退不謗不毀聞已隨喜生信敬心決定真實無復疑網讀誦受持思惟義趣賢護如是等人世尊悉見悉知悉識也賢護諸佛世尊云何見斯諸善男

子及善女人復云何知又云何識賢護若能讀誦受持思念此三昧門如是之人終不爲惡不破淨戒不壞正信不入邪聚賢護是諸善男子善女人等必定深信成就思惟能分別成就思惟於是法中具足信心常能讀誦攝持是法賢護當知是人決不求少功德亦不種少善根賢護是善男子善女人凡所生處或乏資須然諸善根廣大不少賢護是故斯諸善男子善女人已於過去諸如來所修行供養種種善根賢護當知此輩非於一如來所修行供養種種善根也亦非於二三四五乃至十如來所種諸善根也亦

非於百千億數諸如來所種諸善根也賢護當知此諸善男子善女人已於過去百千數無量無邊諸如來所修行供養種種善根方得聞此念佛現前三昧聞已生信心開意解卽以爲實無復疑網旣獲聞已樂欲書寫讀誦受持乃至爲他廣宣是義何以故賢護斯諸善男子善女人往昔已於諸如來前聞是三昧讀誦受持以是義故如來滅後於最末世五百年終法欲滅時法將壞時還當得聞如是三昧聞卽生信無有驚疑不退不沒生大歡喜徧滿身心讀誦受持思惟其義爲他解說乃至一日一夜行是三昧賢

護若復有人聞此三昧無有驚怖亦不退沒不生謗
毀聞已隨喜卽以爲實思惟分別心開意解但能爲
他暫時稱善所獲福聚尚不可量況能讀誦受持勤
思而行爲他廣說至一日夜賢護當知是善男子善
女人因是事故卽得獲得過於無量阿僧祇大功德
聚遂得住於不退轉地隨所願欲如意卽成賢護其
事雖爾我今爲汝更官譬喻明顯此義也復次賢護
譬如有人取此三千大千世界一切大地盡末爲塵
復取一切草木枝葉不問大小皆爲微塵彼人爾時
於彼塵聚取一微塵破壞分拈還令得作爾許微塵

然後復取彼一切塵次第分拈皆令等彼初微塵數
賢護於意云何是微塵數可謂多不賢護答曰甚多
世尊佛言賢護若有善男子善女人取前爾許微塵
數佛刹盛滿衆寶持用布施賢護於意云何彼善男
子善女人所獲福聚復爲多不賢護報曰甚多世尊
然彼善男子善女人因是事故獲得過彼無量無邊
阿僧祇福聚佛復告言賢護吾更語汝如彼善男子
善女人以爾許塵數佛刹盛滿七寶持用布施獲如
斯福復有善男子善女人聞此念佛現前三昧暫生
隨喜信心分別以爲真實心開意解讀誦受持乃至

暫時爲他解說。是善男子善女人所獲功聚。勝前施福無量。無邊非可稱算。非可校計。非可思量。賢護如是善男子善女人。聞此三昧。生隨喜心。乃至暫時爲他解說。尚獲無量無邊福聚。何況是善男子善女人。於此三昧。修多羅中如聞。而信如信。而受如受。而說如說。而行也。爾時世尊爲重明斯義。以偈頌曰。

若以三千大千界

盛滿七寶用行檀

我說彼福雖爲多

不如聞經少功德

菩薩爲求多福聚

信解讀誦復思惟

解說修行念三昧

斯所獲福過於彼

抹三千界盡爲塵

復分一塵等前數

盡取如是諸塵刹

盛滿珍寶以行檀

諸佛所讚三昧經

單以一偈爲他說

我言斯人獲功德

超彼檀福不可量

若復爲他具足說

下至一聲牛乳間

思惟增廣諸善根

何況長遠無量福

一切衆生盡作佛

淨慧終竟證彼如

假於億數多劫中

說斯偈福不可盡

其間彼佛皆滅已

多億數劫常廣宣

終亦不盡彼福邊

緣此深經四句偈

一切所有諸世界	四方上下及四維
滿中衆寶持與他	爲求勝福奉諸佛
彼諸功德難可量	稱計與諸世界等
其有聞受是三昧	善能宣說福過前
若人於此無持疑	其於諸法亦明了
彼則永絕諸惡趣	能入勝寂三昧禪
彼若常能供養我	必受多福不思議
增長多聞證菩提	由思諸佛所讚定
今我語汝誠實言	當念精進莫放逸
一心歡欣發勇猛	自然速證彼菩提

彼爲供養百數佛	乃能受是三摩提
假於後世恐怖時	自當速證微妙定
若有見我與比丘	及汝大士賢護等
如是菩薩樂多聞	決定當得此三昧
若得聞此聖三昧	爲他解釋或書寫
是陀羅尼世尊歎	能證一切佛菩提
若人善思此三昧	一切諸佛咸共稱
當得種性及多聞	諸佛次第而演說

觀察品第六

爾時世尊復告賢護菩薩言賢護若諸菩薩摩訶薩

卽欲思惟此三昧者當云何思賢護彼諸菩薩欲思
惟者卽應當作如是思惟如我世尊今者現在天人
衆中宣說法要賢護菩薩如是一心思惟諸佛如來
坐師子座宣說正法具足成就一切相好最妙最極
殊特端嚴樂觀無厭如是觀察諸大人相於一一相
應當至心卽得明了見諸如來應等正覺旣得見已
當先諮問不見頂相旣得問已然後次第遍觀諸相
皆令明了如是觀已更復思惟諸佛如來衆相微妙
是爲希有願我未來還得如是具足成就諸妙相身
願我未來亦得如是清淨禁戒具足威儀願我未來

亦得如是具足三昧願我未來亦得如是具足智慧
願我未來亦得如是具足解脫願我未來亦得如是
解脫知見願我未來成滿如是諸相身已卽得成就
阿耨多羅三藐三菩提旣成佛已亦當如是處彼天
人大衆之中具足宣說如斯妙法菩薩如是具足觀
察諸佛如來乃至成就一切種已復應更作如是思
惟是中何者是我誰爲我所法誰能得成諸佛菩提
爲身得耶爲心得耶若身得者是身頑駭無覺無知
猶如草木石壁鏡像然彼菩提無色無形非像非相
不可見知不可觸證云何更以頑駭無知無見無識

無所分別無作之身得彼菩提菩提如是既無形色
非相非像不可見知不可觸證誰復於中而行證者
若心得者是心無色不可得見是心無相不可得知
此心如是同於幻化然彼菩提亦爾無色不可見無
相不可知無漏無爲亦同幻化云何可證云何覺知
而言身心得菩提耶彼菩薩摩訶薩如是觀時分明
了了見是身相不得菩提亦知是心不得菩提何以
故諸法無有以色證色以心證心故然彼於言說中
知一切法雖無色無形無相無漏無可觀見無有證
知亦非無證何以故以一切諸如來身無有漏故又

諸如來身無漏故心亦無漏又諸如來心無漏故色
亦無漏

大方等大集賢護經卷第二

音釋

降脹

降匹絳切
脹知亮切

滓

側氏切
澱也

鉦鐸

鉦諸盈切
鐸達各切
鈴屬也

愚也

很

胡懇切
聽從也

粗

坐五切
赤脂切
笑也

甚

息淺也
少

枿

先擊切
牛乳也

浙江嘉興府祝嚴寺般若堂庚子年餘貴刻此
賢護經第二卷計六千九百五十字
該銀四兩七分半
順治十七年 月 日徑山比丘徹微印闢識

大方等大集賢護經卷第三

隋天竺三藏闍那崛多及笈多等譯

觀察品之餘

又諸如來色無漏故受亦無漏乃至行識亦無漏又諸如來戒亦無漏所有三昧智慧亦無漏乃至解脫解脫知見亦無漏如是乃至諸如來諸如來所有言說已說今說當說及一切法斯皆無漏也賢護諸如是等一切佛法智人能達愚者莫知彼若能作如是觀時一切諸法悉不可得云何不可得所謂誰能證也不可得云何證也亦不可得何緣證也亦不可得

彼說能作是觀已如是入滅寂定分別諸法亦不分
別諸法何以故諸法無故賢護如火未生或時有人
發如是言我於今日先滅是火賢護於意云何彼人
是語爲誠實不賢護答言不也世尊佛告賢護如是
諸法從本以來畢竟無得云何於今乃作斯說我能
證知一切諸法我能了達一切諸法我能覺悟一切
諸法我能度脫一切衆生於生死中此非正言所以
者何彼法界中本無諸法亦無衆生云何言度但世
諦中因緣度耳賢護於意云何彼如是說得爲實不
賢護答言不也世尊佛告賢護是故彼諸善男子善

女人若欲成就無上菩提乃至欲成緣覺菩提聲聞
菩提者皆應如是觀一切法作是觀時則入寂定無
有分別非無分別何以故賢護彼一切法無所有不
生然彼定有分別卽是一邊定無分別復爲一邊然
此二邊所有是無寂定非無寂定無思量處無分別
處無證知處無經營處無聚集處無思念處無發起
處賢護是名中道所有數事處等但依世諦說故復
次賢護於彼真實第一義中若中若邊皆不可得何
以故賢護一切諸法猶如虛空本來寂滅非斷非常
無有積聚無有任處無可依止無相無爲無有算數

賢護彼不可數云何爲有不可數故不入於數不入
數故乃至無有智算名言也賢護彼菩薩摩訶薩如
是觀察知如來時不可執著何以故一切法無執著
故以無處所而可執著亦無根本是可斷絕除滅根
本故無依處賢護彼菩薩摩訶薩當作如是思惟諸
佛現前三昧若如是見諸如來已不應取著不當執
持何以故賢護一切諸法不可執持猶如虛空體性
寂滅賢護譬如金鎚安置火中善作鑪鑪融銷鍊冶
熾然毒熱又如鐵丸新從火出炎赫熾然有智之人
不應執觸何以故鐵流金熾觸則燒然故如是賢護

菩薩觀佛不應取著其事若此是故菩薩觀佛色時
不應生著如是觀受乃至行識不應生著又彼菩薩
若觀戒時亦不應著如是觀定乃至智慧解脫解脫
知見亦不應著何以故夫取著者終不能離生死苦
法以是苦法皆由取著故是故菩薩觀察如是諸如
來時不應生於取著之想賢護雖無取著然應勤求
諸佛世尊勝妙功德所謂佛智如來智廣大智自然
智自在智不思議智難稱量智無等等智一切智智
若欲求入如是智者常當精勤思惟觀察見佛三昧
也爾時世尊爲重明此義以偈頌曰

譬如明鏡與油瓶
愚夫於是生染心
彼於無中顛倒想
彼欲熾火之所燒
若有菩薩作是念
菩提甘露在當來
第一義中無衆生
諸法無形如水月
衆色形貌若鏡像
凡夫著想而受羈

女人莊飾曜其形
處處馳騁爲求欲
不知是法虛妄生
斯婦起欲還自發
是名無智著我心
我拔衆生出重苦
世間獨有生老死
豈有菩提而可求
如幻如燄如虛空
彼輩雖縛空無實

若斯智者諸菩薩
了達無人誰受苦
無意分別佛菩提
不見生死諸滓濁
一切色法諸無漏
滅除諸欲解脫心
初念諸佛無相身
如是思惟無餘念
常作空相而思惟
不分別成及與壞

知世顛倒故見真
彼則當成無上覺
其心本來自明淨
彼證真實最勝尊
不可分別妄與空
如是知者證三昧
後聞諸法本清淨
證此三昧誠非難
卽能滅彼微塵聚
一切外道失於中

於一切色無分別
其眼雖覩不累心
彼見諸佛如日輪
法界世間挺超出
其心清淨眼亦明
雖勤精進常所定
彼得多聞不可說
證此三昧真思惟
若以不見證三昧
一切盲者應證知
亦不以見非不見
是中外道皆迷沒
常離相想而思惟
見彼諸佛清淨心
如是見已一切觀
斯人速成此三昧
彼無地水及火風
亦非空界現前住
若欲觀察一切佛
當想處座演妙音

如我今日宣妙法
心樂法者觀我身
彼應無復餘思惟
惟當想佛說法事
如是專念莫他觀
爲求若斯多聞故
一心觀我說此定
總持諸佛之所宣
無有一佛在過去
亦無現世及當來
惟此清淨微妙禪
彼不可言證能說
我於三界無上尊
爲利世間故特出
念證諸佛菩提故
宣此三昧無等倫
若欲身樂及心樂
求佛功德不思議
乃至證彼妙菩提
要當修此勝三昧

欲淨深廣多聞海

為衆生故常勤求

彼應速去諸欲塵

要當修此勝三昧

若欲一生見多佛

見已恭敬復諮詢

彼應速離勿生著

要當觀此妙三昧

是處無欲復無瞋

亦無愚癡與嫉妒

又無無明及疑網

要當住此深寂禪

戒行具足品第七

爾時賢護菩薩復白佛言希有世尊乃有如斯最勝

三昧世尊若諸菩薩捨家出家深心樂欲說此三昧亦當思惟此三昧者彼等應當安住何法而能宣說

及思惟耶佛告賢護言賢護若有菩薩捨家出家深樂廣宣復欲思惟如是三昧者彼出家菩薩當先護持清淨戒行不缺戒行不染戒行不汙戒行不濁戒行不著戒行不動戒行不被訶戒行智者所讚戒行聖所愛敬戒行應當念知如是諸戒也賢護彼出家菩薩云何當得清淨戒行乃至云何當得聖所愛敬戒行也賢護彼出家菩薩應當依彼波羅提木又成就威儀成就衆行乃至成就微塵數等戒行見已驚怖清淨活命於諸戒中當念成就應信甚深不得著忍於空無相無願諸法中聞說之時心不驚怖無有

悔沒賢護以是因緣彼出家菩薩成就如是清淨戒
行不見戒行不著戒行乃至成就聖所愛敬戒行也
爾時賢護菩薩復白佛言世尊彼出家菩薩云何得
有如是不清淨戒行缺戒行染著戒行汙戒行依倚
戒行智所訶毀戒行聖所不愛戒行也佛告賢護菩
薩言賢護若有出家菩薩取著色受持禁戒修於梵
行如是取著受取著想取著行取著識受持禁戒修
行梵行修行已作如是念我今如是持戒如是苦行
如是修學如是梵行願我未來得生天上或生人間
自在有生受諸果報賢護以是因緣彼出家菩薩成

就如是不清淨戒乃至聖者所不愛戒是謂爲求有
故爲有生故爲受欲果故爲生處所故賢護是故彼
出家菩薩念欲說此三昧思此三昧者要當先具清
淨戒行乃至成就聖所愛戒亦念常行檀波羅蜜所
謂最勝施諸法施上施妙施微妙施精妙施無上施
亦常勇猛精進不休不捨重擔不忘正念常行一心
正信清淨無有嫉妬不著世間利養名聞如法索求
以濟形命恒行乞食不受別請厭離人間樂阿蘭若
尊崇聖種敬事頭陀息世語言但論出世處衆靜默
假言不多常敬於他不敢輕慢於一切時常行慙愧

有恩必知知恩必報於善知識常念親近諸師尊所
謹事無違若聞如是甚深經典專心聽受終無疲厭
於法師所起慈父心善知識心乃至生於諸如來想
以爲如是微妙法故成就無上大菩提故轉增愛敬
尊重心故復次賢護若彼菩薩或時至於聲聞人所
聞說如是甚深經法彼法師所無愛敬心無尊重心
不生慈父想不生善知識想不生諸佛想不生教師
想不能親近承事供養隨於何所聞是經典當知是
人不能聽受書寫解說令法久住如是之人若能聽
受若能書寫若能解說令法久住無有是處復次賢

護若彼菩薩或復至於聲聞人所聞說如是增上妙
法不生愛敬心不生尊重心乃至不生諸佛想不能
盡心親近供養者若能讀誦若能受持若能解說令
是經典不速滅者無有是處何以故以不尊重是經
典故是故斯法不久必滅復次賢護若彼菩薩或復
至於聲聞人所聞說如是微妙經典生愛敬心生尊
重心及起教師想諸如來想親承供養卽能聽受亦
能書寫復能解說能令是經久住利益斯有是處復
次賢護若彼菩薩復於聲聞人所聞說如是微妙經
典卽於彼所生尊重心如諸佛想親近承事恭敬供

養者如是之人雖未修學如是經典卽爲修習雖未
解釋卽爲解說令是妙法久任世間不毀不滅斯有
是處何以故以能愛敬尊重法故是故此經久任世
間賢護以是因緣吾今語汝是人於是說法師所生
愛樂心生敬重心生尊貴心起善知識想起教師想
起諸佛想盡心承事恭敬供養也賢護若能如是是
則名爲行我所行受我教誠也復次賢護彼出家菩
薩必欲解說如此三昧復欲思惟此三昧者當當樂
行阿蘭若事不得居處聚落城邑捨離朋黨多求之
處不貪衣食不得貯聚穀米食具不得受畜財物生

資不得貪求名聞利養不惜重命常念捨身遠離貪
著恒修死想常行慙愧不造諸惡攝受正法無有疑
心常念遠離不取衆相當修慈心勿懷嫌怨常起慈
悲無行瞋恚安心喜捨莫想愛憎常當經行破除睡
蓋賢護出家菩薩若能安住如是法行則能修學解
脫思惟如是念佛現前三昧也爾時賢護菩薩復白
佛言希有世尊如來應供等正覺所說經典甚深甚
深最勝微妙不可思議然彼未來諸菩薩等懈怠懶
惰雖聞如是深妙經典生大恐怖驚疑退沒不發歡
喜愛樂之心彼等當復作如是念我今當應餘諸佛

所乃可修習如是經典所以者何我今自知多諸障
難身遇病苦氣力甚微寧堪修行如是經典世事彼
輩如是於甚深法更生放捨遠離之心不能發勤勇
猛精進樂欲成就如是經典世尊爾時亦當有諸菩
薩精進勤求專念之者愛樂是法勸持是法攝受是
法若諸法師說是法者於是法中如法行故能捨身
命不著名聞不求利養不自宣說已身功能不染衣
鉢不樂城邑常趣空閑山林靜處其或聞是微妙法
故生大歡喜更當具足發勤精進聽受如是微妙法
門常讀誦故常念持故思惟義故如說行故彼等於

未來世諸如來所非徒直欲求彼多聞亦無但求在
於有處惟爲成就諸功德故常念勤求精進勇猛世
尊然復應有往昔已曾供養諸佛宿種善根諸善男
子善女人輩發大精進爲聞如是微妙法故更發如
是大誓莊嚴願我當得乾竭肌膚散骨消髓熾然身
心苦行不息必欲成就如是妙典終無暫時懈怠懶
惰而不聽聞微妙勝法亦無不思甚深義理復無捨
他不爲宣說而常勇猛行大精進但爲攝受諸菩薩
故聽聞如來如是妙典聞已卽便生歡喜心爾時世
尊讚彼賢護菩薩言善哉善哉賢護如是如是如汝

所說我今隨喜賢護我隨喜故一切三世恒河沙等
諸佛世尊皆亦隨喜時彼賢護菩薩復白佛言若有
在家菩薩處於世間聞是三昧欲自思惟卽爲他說
乃至一日或經一夜是人安住幾種行法當得成就
思惟三昧爲他說也佛言賢護彼在家菩薩處於世
間若欲修習思惟三昧或一日一夜乃至一犖牛乳
時者吾今語汝彼在家菩薩旣居世間當應正信不
起慳貪常念行施隨多少施當一切施不求果報應
歸依佛又歸依法亦歸依僧不事天神亦無禮拜不
生嫉妬常念隨喜當須清淨如法活命不愛兒女不

著妻妾不染居家不耽財寶常樂出家念除鬚髮修
入關齋恒住伽藍常懷慙愧發菩提心不念餘乘見
有持戒清淨比丘修梵行者終無調戲常行恭敬從
誰聞學如此三昧當於師所生愛敬心起尊重心善
知識想生教師想起諸佛想一切衆具悉以奉之常
當識恩恒思報德以能教我微妙法故賢護彼在家
菩薩處俗之時應住如是諸法行已然後教示如是
三昧如是思惟如是修習時彼賢護菩薩復白佛言
希有世尊如來應供等正覺今乃爲彼出家在諸
菩薩輩正信成就樂深法者宣說如是無上妙法令

任如是無量法行然後當得思惟解說如是三昧世
尊如來滅後如是三昧於閻浮提能廣行不佛告賢
護菩薩言賢護我滅度後此三昧經於閻浮提四十
年中廣行於世而後五百年末一百歲中正法滅時
比丘行惡時誹謗正法時正法破壞時持戒損滅時
破戒熾盛時諸國相伐時當斯之際頗有眾生熾然
善根往昔已曾親近諸佛供養修行植善種子爲彼
諸丈夫輩得是經故此三昧典復當流行於閻浮提
所謂佛威神故故令彼等於我滅後聞是經已歡喜
書寫讀誦受持思惟其義爲他解釋如說修行爾時

賢護菩薩及寶德離車子聞如來說正法滅時悲泣
兩淚從座而起整理衣服偏袒右肩右膝著地合掌
恭敬而白佛言世尊我等當於如來滅後後五百歲
末百年中沙門顛倒時正法欲滅時誹謗正法時破
壞正法時持戒損滅時破戒增長時正法護滅時非
法護增時眾生亂時諸國相伐時能於如來所說經
典妙三昧中讀誦受持思惟義理爲他廣說何以故
我心無厭終不知足是故我於如來所說修多羅中
能聽聞故能書寫故能讀誦故能受持故能思惟故
能修行故能廣說故爾時商主優婆塞伽訶岌多居

士之子那羅達多摩納等聞如來說未來世中正法壞滅爲正法故悲哀泣淚從座而起整理衣服偏袒右肩右膝著地恭敬合掌而白佛言世尊我等能於如來所說妙修多羅及能受持修多羅者我皆攝護令得增長世尊我今復爲如來所說微妙經典作其加護令得廣宣人住於世何以故以是經典能於無量阿僧祇劫多所成就阿耨多羅三藐三菩提故世尊我等得聞未曾有法至心受持思惟其義爲他解說廣行流布也世尊我今聞此甚深經法一切世間無有信者我先爲其造善根罷然後爲解爾時衆中

有五百比丘比丘尼優婆塞優婆夷四部衆等聞如來說未來世中正法壞滅爲正法故悲泣雨淚從座而起整持衣服偏袒右肩右膝著地恭敬合掌而白佛言世尊我等受持如來正法然諸大士善丈夫輩爾時於我當作依止當作覆護爲我經紀能令我等於如來所說如是甚深修多羅中取真實義如法修行惟願世尊付囑我等諸善丈夫分明立記何以故世尊我及彼等皆能護持攝受正法及攝受者故爾時世尊卽便微笑放金色光其明遍照十方世界諸佛國已還至佛所右遶三周從頂上沒爾時尊者阿

難作如是念世尊昔來已多微笑然於笑時必爲異
事我今應問微笑因緣如是念已卽從座起整持衣
服偏袒右肩右膝著地合掌向佛以偈白言

其心清淨行無穢

有大威德鬼神通

一切最尊世中上

顯現無垢如明月

無礙聖智解脫心

迦陵伽聲天中最

一切異論莫能動

今忽微笑有何緣

通達正真爲我說

能多利益兩足尊

聞是如來微妙音

一切皆當大歡喜

諸佛世尊豈虛笑

佛復放光有勝人

誰於斯日獲大利

是故今應宣笑旨

誰於今日得證真

誰於今日受法王

誰於今日自灌頂

誰於今日登佛位

誰於今日利世間

誰當總宣佛法藏

誰於佛智得常住

以是尊應顯笑緣

爾時世尊卽以偈告長老阿難曰

阿難汝見大集不

攝護五百從座起

身心歡喜發誠言

我輩當來獲斯法

此等一心瞻察我

我於何時亦復然

咸於我前興大誓

我輩當來證斯道

復有八輩從座起	五百上首此為尊
彼於末世法壞時	為世間法故宣說
我今告汝如是言	於此眾中無礙智
是輩非於一佛所	起立合掌敬諸尊
我觀往昔無量世	八萬諸佛皆現前
八人為首從座起	還為護持是妙法
前此八萬億由他	復值如是數諸佛
心得解脫大名稱	彼時此輩已攝持
今復於我勝法中	能為攝護利益首
教化無量菩薩眾	斷除嫉妬諸大人

此等於我滅度時	取我舍利與供養
善持我斯諸佛事	安置篋笥徧十方
平地造塔或在山	付囑天龍及金鳥
斯等依仗於此經	壽終皆得生天上
後雖轉生於人間	而常不離勝家姓
善持我斯菩提事	還發大願隨本心
或時為法至他國	恒值如是深妙典
得已轉授眾多人	以歡喜心除嫉妬
求法精誠無懈倦	輕財賤命豈愛身
降伏一切諸外論	常以妙法惠施彼

時世無能受斯經
惟有此輩五百賢
復此八士諸菩薩
樂恒廣宣多利益
此八正士爲上首
遠離嫉妒棄名聞
如是比丘及尼輩
巧智無妒登法師
彼不思議神德具
得微妙樂除衆苦

亦無讀誦轉教人
今於我前從座起
當來北天授斯法
弘是甚深修多羅
彼五百數復無增
來世當授廣大法
諸優婆塞優婆夷
當成正覺大威德
百福之體相莊嚴
長拔三毒煩惱根

此等從今捨命已
一切生中常和合
旣捨一切惡趣生
功德不可知邊際
復當得見彌勒佛
恭敬供養利益他
彼時此輩恒集會
爲此諸佛妙菩提
於後末世法壞時
如是處所恒修行

終不受生惡道中
所遇菩提最勝事
亦能永離諸難處
如是無量受多福
於彼常起和合心
惟求無上菩提故
承事超世兩足尊
當度生死登彼岸
彼等亦常持此法
遇彌勒世事若斯

經
一
大
可
於
此
賢
劫
內
廣
爲
利
益
世
間
燈
安
任
三
世
無
畏
所
不
可
思
議
難
得
邊
常
護
如
是
勝
佛
事
彼
彼
咸
同
修
供
養
我
任
多
世
那
由
他
及
是
寶
德
出
衆
珍
當
見
恒
沙
無
數
佛
前
已
經
歷
多
劫
數
無
量
億
劫
誰
能
知
妙
算
不
能
盡
其
形
於
彼
亦
受
無
上
經
商
主
友
多
佛
摩
那
今
此
護
大
菩
薩
而
或
於
先
取
滅
度
其
有
在
前
成
菩
提
斯
皆
供
養
廣
修
行
將
來
億
數
多
諸
佛
彼
一
切
處
護
是
經

若有衆生得聞名
能發勇猛師子吼
若有衆生但聞名
一切作佛無疑慮
其所受法不思議
利益廣大無窮盡
彼過去佛難思量
此輩於彼廣行施
彼諸功德不可數
於菩提中無增減
或於覺時及睡夢
彼輩皆得天人尊
直能信敬及隨喜
何況供養於彼身
壽命法任亦無量
功德智慧不可知
清淨持戒恒沙數
惟求無上佛菩提
多劫宣說莫能窮
常念護持是經法

阿難若人護此經 書寫讀誦及憶念
汝應決定興愛敬 終不離是五百中
阿難若人持此經 自當勤心求堅固
淨持禁戒捨睡眠 決定得斯妙三昧
我毘尼處說木叉 諸比丘學居蘭若
若能頭陀不捨離 得此三昧定無疑
一切別請盡能捨 凡是美味皆斷除
師所常起諸佛心 誰云不證斯三昧
貪恚癡患先覺知 我慢嫉妒咸遠離
情無垢著念無爲 讀誦思惟勝三昧

清淨意處無可染 調伏諸根息怨嫌
一心專念如來身 讀誦受持妙三昧
若有菩薩在居家 心常堅任出家事
受持讀誦口業成 心常念學此三昧
恒應修持五種戒 亦常數受八戒齋
常任寺廟捨資生 讀誦思惟此三昧
不當耽著衆婦妾 勿愛兒女及珍財
任優婆塞行羞慙 但當憶持此三昧
莫於他所起害心 唯思除去諸調戲
無處可著任於忍 但念思惟此三昧

莫於財物生執著
 無處染著安彼忍
 若比丘尼求此經
 調戲貢高及我慢
 應發精進破睡眠
 心愛樂法淨命存
 心常不共貪欲俱
 不以魔縛繫衆生
 無以諂曲有所爲
 莫行兩舌離別他

華香塗粉及諸髮
 但當受持此三昧
 當勤歸敬除嫉妬
 證彼菩提亦不難
 一切諸求皆當斷
 惟當讀誦此三昧
 莫起恚恨無迫惱
 惟當受持此三昧
 勿貪好衣及塗熏
 惟當受持此三昧

大方等大集賢護經卷第三

音釋

男女聲色不繫心
 於教師所生佛想
 所生永離衆惡道
 破除三有諸障難
 要常受是三摩提

寂絕無諸邪念事
 惟當受持此三昧
 於佛法中不空信

鑪鞞 鑪落胡切鞞蒲拜切吹火罷也 羈 居宜切羈廩也 炭 魚及切 篋 篋苦切 筥 篋苦切

筥相吏切 篋筥屬也

浙江嘉興府楞嚴寺般若堂庚子年餘貴刻此
 賢護經第三卷計六千九百五十字
 該銀四兩零七分半
 順治十七年 月 日 徑山比丘徹微印開識

爾時賢護菩薩及寶德離車子善商主長者伽訶定
 居士子那羅達多摩納水天長者與五百徒眾等聞
 佛所說皆大歡喜即以五百上衣服奉覆世尊復以
 多種供具供養世尊心樂法故各以已身奉承如來
 爾時世尊告阿難言是賢護菩薩常於彼等五百徒
 眾而作義師說諸法要教化慰喻令彼歡喜以歡喜
 故彼輩即得隨順之心真實之心清淨之心離欲之

大方等大集賢護經卷第四

隋天竺三藏闍那崛多及笈多等譯

稱讚功德品第八

爾時賢護菩薩及寶德離車子善商主長者伽訶定
 居士子那羅達多摩納水天長者與五百徒眾等聞
 佛所說皆大歡喜即以五百上衣服奉覆世尊復以
 多種供具供養世尊心樂法故各以已身奉承如來
 爾時世尊告阿難言是賢護菩薩常於彼等五百徒
 眾而作義師說諸法要教化慰喻令彼歡喜以歡喜
 故彼輩即得隨順之心真實之心清淨之心離欲之

心除諸煩惱無復蓋纏時五百人一心合掌恭敬頂
禮退住一面爾時賢護卽白佛言世尊菩薩摩訶薩
具足幾法而能得此念佛三昧也爾時世尊告賢護
言賢護若菩薩摩訶薩具足四法得是三昧何等爲
四一者不著一切外道語言二者不樂一切諸愛欲
事三者常不遠離頭陀功德四者常厭三界諸有生
處賢護是爲菩薩摩訶薩具足四法得此三昧復次
賢護若有善男子善女人讀誦受持是三昧典或時
復能爲他解說現前卽獲五種功德何等爲五一者
一切衆毒不能損害二者一切兵仗不能破傷三者

一切諸水不能漂沒四者一切猛火不能焚燒五者
惡王縣官不能得便所以者何由是三昧慈心力故
賢護若彼善男子善女人一心勤求是三昧時讀誦
受持是三昧時思惟修習是三昧時爲他解釋是三
昧時若有衆毒及以兵仗一切水火惡王縣官能傷
害者無有是處復次賢護假使世間壞劫之火世界
燄赫天地洞然若彼受持此三昧典諸善男子及善
女人設令墮落大劫火中三昧威神彼火卽滅賢護
又如鬻水能滅小火如是賢護假使持經諸善男子
及善女人落彼火中三昧力故大火隨滅若不滅者

無有是處復次賢護若彼善男子善女人受持經時
若彼惡王若惡縣官若劫賊若師子若虎狼若蛇毒
若能作障礙者無有是處又設彼等行是經時若被
夜叉若羅刹若餓鬼若鳩槃荼若毘舍闍乃至一切
非人能爲障礙亦無有是處又若彼男子女人讀誦
經時正思惟時爲他說時入三昧時行梵行時若失
衣若失鉢乃至有諸障礙事者無有是處惟除宿殃
不可轉者復次賢護若彼受持三昧經典諸善男子
善女人輩若患眼若患耳若患鼻若患舌若患身若
患心復有諸餘種種患難乃至命難梵行難者亦無

是處復次賢護若彼男子女人於此經中得如是聞
得如是見得如是知如是具足已若不值佛若護正
法破和合僧背佛菩提者亦無是處賢護當知卽彼
持經男子女人如上諸事莫能爲礙惟除宿殃不能
轉耳復次賢護彼善男子善女人若是經者常爲一
切諸天稱讚亦爲一切諸龍稱讚又爲一切夜叉稱
讚又爲一切乾闥婆等之所稱讚又爲一切阿修羅
等之所稱讚又爲一切迦樓羅等之所稱讚又爲一
切緊那羅等之所稱讚又爲一切摩睺羅伽之所稱
讚又爲一切人非人等之所稱讚又爲一切四大天

王之所稱讚又爲一切忉利天王之所稱讚又爲一切大梵天王之所稱讚如是乃至常爲一切諸佛世尊之所稱讚也復次賢護又彼諸善男子善女人持是經者常爲一切諸天愛敬如是乃至常爲一切諸龍夜叉乾闥婆阿修羅迦樓羅緊那羅摩睺羅伽人非人等之所愛敬又爲一切四大大王之所愛敬如是常爲一切忉利天王乃至一切大梵天王之所愛敬如是常爲一切諸菩薩輩乃至一切諸佛世尊之所愛念也復次賢護又彼諸善男子及善女人以經力故常爲一切諸天守護如是常爲一切諸龍夜叉

乾闥婆阿修羅迦樓羅緊那羅摩睺羅伽人及非人之所守護又爲一切四大大王如是忉利天王乃至大梵天王之所守護如是常爲一切諸菩薩輩乃至一切諸佛世尊悉皆覆護十方世界無量阿僧祇世界中現持法者復次賢護又彼諸善男子善女人以經威力故一切諸天皆欲見之如是一切諸龍夜叉乾闥婆阿修羅迦樓羅緊那羅摩睺羅伽及人非人等皆思欲見又彼一切四大大王如是一切忉利天王乃至一切大梵天王皆思欲見如是一切諸菩薩輩乃至一切諸佛世尊各欲見之復次賢護又彼諸

善男子善女人以經威故一切諸天常至其所親見其形令彼觀覩如是一切諸龍夜叉乾闥婆阿修羅迦樓羅緊那羅摩睺羅伽人非人等皆見其形隨宜利益又彼一切四大王忉利天王乃至一切大梵天王等皆親臨視如是一切諸菩薩輩乃至一切諸佛世尊非但晝日或於夢中爲現形像自稱名號摩頂慰安稱揚勸發也復次賢護又彼諸善男子善女人雖未曾聞諸餘經典以是三昧威神力故自然有人來至其所乃至夢中爲其宣說令彼得聞憶持不失也復次賢護我若說彼諸善男子善女人暫持三

昧微妙經典所得功德設經劫數終不能盡我之智辯雖復無窮亦不能說何況彼輩聞此三昧依教修行如法而住也爾時世尊爲重明此義而說偈言

若人有能解釋斯

諸佛大寂勝三昧

假令我今說功德

猶彼恒河取一沙

若能爲他說三昧

水不能溺火不燒

刀仗毒害所不傷

王賊惡官不得便

若能讀誦三昧經

不畏一切恐怖事

如彼大蛇諸大毒

此等經力能滅除

若有受持是經典

不畏一切諸惡人

夜叉羅刹及諸龍
若常守護供養者
師子虎狼諸獸等
若能護持此三昧
遠離一切惡心人
若能解說此三昧
所生報眼終不衰
若人證知深寂禪
一生永絕諸惡色
若有能讀三昧典

彼徒終無得其便
便在蘭若爲朋類
犀牛豺豹及野干
彼有威力不可當
及諸夜叉噉精氣
彼無諸病及障災
言詞清妙有大辯
身體雄健無眾病
後終不畏地獄道
諸天守護及龍神

夜叉羅刹與怨讎
若能爲他說斯經
諸天晝夜常歌歎
若人爲他常轉讀
彼諸客色無等倫
若能轉教諸眾生
時年亢旱穀儉貴
若人解說此三昧
假雖魔嬖諸眾生
我前說彼持經人

彼雖惡臨不驚懼
天龍夜叉百歡喜
一切世尊愛若子
一切法中無有疑
豈於菩提有退滅
遭值惡王人民亂
終無受弊及飢荒
所有功德不思議
不能動斯一毛髮
眾患恐怖及煩惱

彼終不能加損害

惟除往業先定殃

若有護持於此經

是則於吾為長子

我已稱讚於彼等

當來之世亦復然

若能護持如斯法

自當恒發歡喜心

咸共宣通勿放捨

我今為汝如是說

饒益品第九

爾時世尊復告賢護菩薩言賢護我念往昔過於無量阿僧祇劫時有一佛號無畏王如來應供等正覺明行足善逝世間解無上士調御丈夫天人師佛世尊出興於世當爾之時有長者子名須達多與二萬人俱詣彼佛無畏王所到已頂禮彼世尊足敬禮畢已退坐一面時須達多即便請彼無畏如來廣宣如是二昧深義賢護爾時彼無畏王如來應供等正覺知長者子有深信心樂欲聽聞如是二昧應時隨順而為敷演賢護時須達多於彼佛所聞三昧已讀誦受持思惟其義即如說行既修行已還即於彼無畏王如來法中捨家出家剃除鬚髮服袈裟衣經八萬歲思惟住持如是三昧又復在彼無畏王如來所聞一切法皆悉受持是後復經諸如來所聞說斯法亦皆能持於諸佛所種諸善根能廣成就不思議已然

後捨命卽得上生三十三天同受果報卽彼劫中還復值遇第二如來而彼如來從刹利生出家成道名曰電德如來應供等正覺而復於彼電德如來法中出家修行經八萬四千歲還復思惟如是三昧而更值遇第三如來彼第三佛於婆羅門家生已亦出家成道號曰光王如來應供等正覺復於彼如來所出家修行亦於八萬四千歲中常得思惟如是三昧賢護時彼長者子須達多自是之後過百餘劫卽得成就阿耨多羅三藐三菩提賢護汝應當知爾時彼長者子須達多者豈異人乎卽彼過去然燈如來應供

等正覺是也賢護是故當知彼長者子須達多者以有如是愛樂法故復有如是求法行故能速成就阿耨多羅三藐三菩提也復次賢護汝今當觀是三昧王爲諸菩薩及衆生輩而作幾許大弘益事所謂當得一切諸佛智地故復能攝受一切諸佛多聞海故賢護是故汝等當應勤求如是三昧常樂聽聞讀誦受持思惟修行旣聞受已當復爲他讀誦受持解釋義理令他勤求咸得聞受正念思惟如說修行所以者何賢護若能勤求讀誦受持正念修行廣宣流布是三昧者不久當得證諸佛智諸如來智自在智

不思議智不可稱智無等等智一切智智乃至得彼
不共他智故賢護若復有人能善宣說彼應正言今
此三昧卽是一切諸菩薩眼諸菩薩父諸菩薩母能
與一切諸菩薩輩諸佛智者賢護如是說者是爲善
說時善說是三昧也賢護若復有諸男子女人能善
說時彼當正言是三昧者卽是佛性卽是法性卽是
僧性卽是佛地是多聞海是無盡藏頭陀是無盡藏
頭陀功德是無盡藏諸佛功德是無盡藏能生深忍
是能生大慈能生大悲能生菩提也賢護是爲彼能
善說時說是三昧也賢護若復有人能善宣說彼三

昧時彼應正言是三昧王能破一切諸法黑暗能作
一切大光明賢護是爲彼能善說三昧也賢護汝
宜觀此菩薩念佛現前三昧爲諸衆生作大利益乃
至一切諸菩薩輩住於此土徧見十方一切世界諸
佛世尊到諸佛所恭敬禮拜聽聞正法供養衆僧亦
不貪著賢護以是義故諸菩薩等若欲成就三昧王
者常當專心精勤觀察彼四念處賢護云何菩薩觀
四念處賢護菩薩摩訶薩常當專心觀察身行畢竟
不見一切諸身常當專心觀察受行而亦不見一切
諸受常當一心觀察心行而亦不見一切諸心常當

一心觀察法行而亦不見一切諸法賢護如是等事誰能信者惟彼漏盡阿羅漢及以阿毘跋致諸菩薩等賢護是中一切愚惑凡夫於彼念佛現前三昧常當思惟諸佛世尊不得生著又亦思惟諸佛世尊說如斯法而亦不著又亦思惟我聽聞法一切所爲皆不得著何以故賢護諸法皆空本來無生故賢護諸法不可念無念處故賢護諸法遠離絕心想故賢護諸法不可執持真如無得故賢護諸法無染如虛空故賢護諸法清淨遠離衆生故賢護諸法無濁因緣滅故賢護諸法無爲富伽羅不可得故賢護諸法卽

涅槃相本性清淨故賢護諸法無所有一切物不可得故賢護是故諸菩薩等若欲思惟此三昧者不可異相而能得入無得相故得見諸佛正念諸佛和合相應亦得思惟助菩提分念聞正法思量分別選擇菩提分而不見自身亦不證諸法所以者何賢護是中不可以色相故而得見佛不可以聲相故而得聞法不可以希望心成就檀波羅蜜不可以樂著諸有具足尸波羅蜜不可以慳恪秘法而得涅槃不可以深著補伽羅想而獲多聞不可以攀緣諸行而能遠離諸事不可以樂著住處而得證果不可以隨順貪

經
愛離諸過非不可以常樂鬪諍成就諸忍不可以常
行惡業而得善果不可以聲聞乘人而證菩薩念佛
三昧亦不可得諸菩薩忍亦不可以嫉妬取著而得
空三昧亦不可以行愛欲而入奢摩他亦不可以懈
怠懶惰證諸聖道乃至不可以捨異念諸物而能
成就思惟也賢護是故我今以此三昧付囑世間諸
天王輩受持守護亦付於汝當來宣布勿令斷絕於
是世尊說斯法時有八那由他欲色界諸天子皆發
阿耨多羅三藐三菩提心復有無量百千人亦發阿
耨多羅三藐三菩提心然而斯輩皆於未來過恆沙

劫盡得成就阿耨多羅三藐三菩提皆同一號名正
解脫如來應供等正覺住世教化壽命亦等賢護以
斯初發菩提心故尚得如是無量功德具足成就阿
耨多羅三藐三菩提況復我昔行菩提時供養我者
彼寧不速成就阿耨多羅三藐三菩提也賢護復有
無量無邊衆生聞說此法得淨智眼復有八百諸比
丘等於諸漏中心得解脫爾時世尊爲重明此義而
說偈言

誰當受持此三昧

彼於福聚不可量

斯等戒行無塵垢

本心清淨猶如鏡

誰當受持是三昧

多聞深廣無邊涯

智慧自然無缺減

功德盛滿若明月

誰當受持是三昧

得覩諸佛不思議

智慧觀察希有法

不思議人皆守護

誰當受持此三昧

曾見無量諸世尊

彼佛說法難稱量

皆當奉承修供養

誰能受持此三昧

彼爲世間作燈光

大悲如斯拔衆苦

所有世尊悉供養

誰能受持此三昧

未來無數諸聖尊

若有菩薩欲見者

清淨信心修供養

誰能受持此三昧

彼勝得利難思議

善能下生於人間

常得出家善求食

誰能護持此三昧

彼受多福不思議

復能住持於將來

獲斯功德最後利

具足五法品第十

爾時賢護菩薩從座而起整理衣服偏袒右肩右膝
著地恭敬合掌而白佛言世尊唯願世尊及比丘僧
明日食時臨顧我家受我供養憐愍我等諸衆生故
世尊默然受賢護請時彼賢護知佛受已頂禮尊足
右遶三匝於是辭還遂復詣彼摩訶波闍波提比丘

尼所到已頂禮波闍波提比丘尼足而卽白言願阿
梨耶及諸尼衆憐愍我故受我明朝所設微供爾時
摩訶波闍波提比丘尼默然受請賢護知已頂禮辭
還時彼賢護復詣寶德離車子所語寶德言寶德汝
來汝之所有親戚眷屬朋友知識及此會中優婆塞
衆乃至一切王舍大城及以自餘城邑聚落諸新來
者爲我請曰受我明朝所設飯食爾時寶德離車童
子受賢護言卽告會中諸優婆塞親戚眷屬等曰仁
輩當知彼賢護菩薩令我告汝明日食時受我微供
爾時賢護菩薩寶德離車子及善商主長者伽訶爰

多居士子那羅達多摩納水天長者并及一切諸餘
眷屬朋友知識等頂禮佛足已還彼賢護菩薩舍宅
到已佐彼賢護經營卽於其夜約勅家人辦具諸種
精妙上饌所謂世間凡可食噉色香美味百物備有
乃至外國遠來貧窮乞丐亦爲辦具種種精膳而供
給之與諸大衆一等無異所以者何凡諸菩薩心無
憎愛不敢輕他於諸衆生皆平等故爾時娑婆世界
主大梵天王乃至忉利天王釋提桓因四大天王提
頭賴吒等及彼善德天子與諸眷屬咸爲人身贊助
其事欲令賢護菩提果報速成就故爾時賢護與諸

經

大方廣華嚴經卷四

十三

經

大方廣華嚴經卷四

十三

眷屬善友知識等掃灑其家乃至王舍大城街巷道路處處皆悉懸妙旛蓋廣設種種諸莊嚴具而莊飾之又以諸種微妙華香布散其地復燒世間第一名香而爲供養時彼賢護如是莊嚴王舍大城及妙食已於明旦時與諸眷屬詣世尊所頭面禮敬而啓白言世尊我事已辦願知此時爾時世尊於晨朝時爲賢護故著衣持鉢與彼無量比丘比丘尼優婆塞優婆夷天人大衆左右圍遶向彼賢護菩薩舍宅於是賢護發如斯念我家隘小不受多衆自非世尊威靈加護令宅寬廣盡爲瑠璃令諸城內一切人民莫不

明見亦令今此天人大衆隨意受用無所乏少亦快乎爾時世尊知彼賢護心所念已卽以神力令其家宅嚴麗寬廣所有衆具變成瑠璃亦令城內一切人民皆得覩見分明顯了足令大衆隨意用之爾時世尊入賢護宅隨其牀座安詳而坐亦令一切諸比丘比丘尼優婆塞優婆夷人天大衆隨其部類次第而坐時彼賢護及寶德離車子善商主優婆塞伽訶及多長者子那羅達多長者子旣見世尊與彼四部天人大衆皆安坐已於是賢護躬以自手持最妙食奉上世尊世尊受已然後授與諸四部衆及與一切

天人大衆種種上妙香美味食咸令自恣悉皆豐滿
如是一切飯食斯畢澡手漱口乃至洗滌鉢器持舉
皆竟賢護於是別置小座在世尊前頭面頂禮然後
退坐一心瞻仰爾時世尊卽爲賢護菩薩及寶德離
車子善商主優婆塞伽訶岌多長者子那羅達多摩
納等乃至四部天人大衆等如應說法令其解知開
導慰喻令其歡喜然後與諸比丘比丘尼天人大衆
歸還本所時彼賢護菩薩後食畢已將諸眷屬善友
知識及百千衆左右圍遶至世尊所恭敬禮拜退坐
一面胡跪合掌而白佛言世尊菩薩摩訶薩具足幾

法當能證此現前三昧佛言賢護菩薩若能成就五
法則便得此現前三昧何等爲五所謂一者具甚深
忍滅除至盡二者實無所盡無有盡處三者本無有
亂滅除諸亂四者本無有垢滅除諸垢五者本無有
塵斷離諸塵賢護是爲菩薩摩訶薩具足成就無生
忍故而能得此現前三昧復次賢護菩薩摩訶薩復
有五法能得三昧一者深默諸有不受諸行二者一
切生處念菩提心三者所生常見諸佛世尊四者終
不耽著陰界諸入五者終不愛著受欲樂事賢護是
爲菩薩摩訶薩具足五法成就三昧復次賢護菩薩

摩訶薩復有五法能得三昧一者常當思念無邊際
心二者常能善入禪定思惟三者分別思惟一切諸
法四者於諸衆生無有諍心五者常以四攝攝受衆
生所謂布施愛語利行同事賢護是爲菩薩摩訶薩
具足五法成就三昧復次賢護菩薩摩訶薩復有五
法能得三昧一者於諸衆生所常行慈心二者於一
切時念修聖行三者常行忍辱見破戒者恒生敬心
四者於自和尚阿闍黎所不說已能五者於一切處
不敢輕他賢護是爲菩薩摩訶薩具足五法則能證
是現前三昧復次賢護菩薩摩訶薩復有五法能得

三昧一者常依聖教如說修行二者清淨意業滅身
口惡三者清淨戒行斷除諸見四者常求多聞深信
諸善五者常念如來應等正覺賢護是爲菩薩摩訶
薩具足五法則能獲得現前三昧復次賢護菩薩摩
訶薩復有五法能得三昧一者常行大施能爲施主
不起慳貪心無嫉妬弘廣心施純直無諂於諸沙門
及婆羅門貧窮孤獨一切乞人無所愛惜無有勝上
可重之物而不施者所謂一切微妙飲食名衣上服
第一房舍諸種敷具燈燭華香凡所受用皆悉捨之
雖常行施而不求報憐愍一切無疑惑心旣施之後

終無變悔二者常爲施主而行法施所謂常爲衆生說如斯法所謂第一最上最勝最妙最精修行知是大法施時能出一切無礙辯才文義次第相續不斷如來所說甚深法中皆能安住成就深忍或時被他誹謗罵辱捶擊鞭打終無瞋恨穢濁毒心亦無驚懼種種苦惱而心無畏常懷歡喜三者若聞他說此三昧時至心聽受書寫讀誦思惟其義廣爲他人分別演說令是妙法久住世間終無秘藏使法疾滅四者常無嫉妬遠離諸惱棄捨蓋纏斷除塵垢不自稱譽亦不毀他五者於諸佛所常重信心於諸師長常行

敬畏於知識處常生慙愧於諸幼稚常懷慈憐乃至受他小恩尚思厚報何況人有重德而敢輒忘常住實言未曾妄語賢護是爲菩薩摩訶薩具足五法則能獲得如是三昧爾時世尊爲重明此義以偈頌曰

若於深法心欲樂	厭離一切諸後有
智者不願一切生	若能如是得三昧
不用一切諸外論	乃至語言不聽受
永斷世間諸五欲	若能如是證三昧
清淨持戒住梵行	所生不念諸女人
深厭五欲真佛子	若能如是證三昧

常行大施不求報	亦無住著悔恨心
一捨已後不重緣	唯當攝念思諸佛
憐愍眾生行施時	決定除疑無變退
安住調柔而修施	若能如是得三昧
若於財施為大主	無有憍慢嫉妬心
行一切施常踊躍	若能如是得三昧
又於法施為上導	善解微妙修多羅
能知其深寂滅法	若能如是得三昧
安住甚深諸法中	善能堪忍無嫉妬
雖被撾罵無惱恨	若能如是得三昧

或時聞說此經典	書寫讀誦巧廣說
唯為法住利世間	若能如是得三昧
於諸法中不秘恪	不求利養及名聞
但為紹隆諸佛種	若能如是證三昧
遠離睡眠與衰惱	除斷嫉妬及蓋纏
不自稱讚輕毀他	能滅我相得三昧
正信諸佛及法僧	常行誠心無欺誑
不忘一切諸恩報	彼證三昧無艱難
若能真說無妄言	凡有所行亦不失
所作雖微獲報廣	彼於證法無障礙

若人有能具斯法
清淨持戒諸有恩
彼得菩提尚不難
何況甚深微妙定

授記品第十一

爾時世尊告賢護菩薩言賢護我念往昔過於無量
阿僧祇復過無量阿僧祇劫初於然燈佛世尊所聞
此三昧聞已卽證如斯三昧見諸如來常現在前從
是已來經於無量阿僧祇諸世尊所皆受是經修行
供養彼佛世尊授我記曰摩納汝於來世當得作佛
號釋迦牟尼如來應供等正覺明行足善逝世間解
無上士調御丈夫天人師佛世尊賢護汝輩亦當專

精一心思惟修習如斯聖法非是凡夫所見境界甚
深寂靜衆相滅處如是學已未來自然成就阿耨多
羅三藐三菩提無有艱難如我不異汝等當知若有
安住是三昧者自然當得近大菩提爾時世尊爲重
明此義以偈頌曰

我昔遇彼然燈佛
見已卽得三菩提
從是常觀諸如來
具足功德大名稱
汝但多集諸功德
一心專念卽得成
若人能行此法中
當得無上菩提道

甚深品第十二

爾時賢護菩薩復白佛言世尊云何思惟如是三昧
佛言賢護若有善男子善女人念欲思惟此三昧者
觀彼色時不應取著於彼聲中不應取著於彼香中
不應取著於彼味中不應取著於彼觸中不應取著
於諸法中不應取著於諸生中不應取著於一切處
不應取著於是法中當起真實大慈行也是中何等
名爲三昧所謂於一切法中如法行故若諸菩薩觀
念處時當應如是觀察身行終不分別見身行處觀
察受行亦不分別見受行處觀察心行亦不分別見
心行處觀察法行亦不分別見法行處菩薩當應如

是觀察思惟三昧何以故賢護彼菩薩觀身行時於
身不起思惟分別觀受行時於受不起思惟分別觀
心行時於心不起思惟分別也觀法行時於法不起
思惟分別故所以者何一切法不可得故如是諸法
旣不可得云何當有分別思惟賢護是故一切法無
有分別無分別者無有思惟無思惟者當知彼中無
法可見賢護無可見故便爲無礙一切法中無障礙
故卽是菩薩現前三昧菩薩成就是三昧故卽得觀
見無量無數過阿僧祇諸佛世尊并所宣說皆悉聽
聞聞彼法已咸能受持彼諸如來應等正覺所有一

切無礙解脫解脫知見亦卽能得彼無礙智復次賢
護菩薩觀察四念處時無法可見無聲可聞無見聞
故則無有法可得分別亦無有法可得思惟而亦復
非瞽盲聾類但是諸法無可見故是故觀時不生住
著而見諸道思惟道故卽於諸法無有疑網無疑網
故見佛如來見如來故永離迷謬無迷謬故知一切
法終無可見何以故菩薩若有如斯見者則取彼見
取彼見故則取法相取法相故則取事業取事業故
則見衆生見衆生故則見壽命見壽命故則見富伽
羅見富伽羅故則見諸陰見諸陰故則見諸入見諸

入故則見諸界見諸界故則見諸相見諸相故則見
諸物見諸物故則見彼因見彼因故則復見緣以見
緣故則便求取以求取故則有有生何以故賢護一
切諸法終不可取無可取故菩薩於彼一切諸法不
思不念不見不聞賢護終不如諸外道若外道弟子
取者富伽羅及以我見也賢護菩薩終不作如是見
云何見菩薩見者如如來見終不退轉菩薩見如辟
支佛見如阿羅漢見菩薩當應作如斯見如斯見故
不憶不念不見不聞以不憶念及見聞故滅諸妄想
卽得思惟如斯三昧也復次賢護譬如虛空本無形

色不可覩見無有障礙無所依止無有住處清淨無染亦無垢濁諸菩薩輩見一切法亦復如是所謂於彼有爲無爲一切法中無有障礙乃至亦無處所以眼清淨無障礙故一切諸法自然現前彼諸菩薩如是念時卽見諸佛其所莊嚴狀如金輦具足威儀如百千光炎赫斯照如秋滿月衆星圍遶如轉輪王軍衆熾盛如天帝釋四輔中尊如大梵王處彼天座如師子王威伏衆獸如鮮白鵠處空而飛如須彌山王安住大海如大雪山出諸良藥如鐵圍山攝持猛風如彼水界住持大地如大風輪淨虛空界如須彌頂

壯麗天宮如是賢護彼諸如來應等正覺以智德光照明一切三千大千諸佛世界其事若此賢護彼諸菩薩於正觀中復如斯念而諸如來有所宣說我昔聽聞聞已讀誦受持修行如是念已從三昧起如彼定中所聞諸法思惟其義爲他宣說賢護當知是三昧王爲諸菩薩作斯利益能與如是諸功德聚所謂世間出世間一切諸法也賢護是故若彼善男子善女人隨欲求證無上菩提當應聽聞如是三昧聞已書寫讀誦受持修習思惟廣爲他說今是妙法流布世間爾時世尊爲重明此義以偈頌曰

諸佛清淨離塵垢
鐘鼓鐺鏘衆妙音
布散諸種超世香
然燈供養衆塔廟
佛法甚深難可見
彼如自性初不遷
猶日月天初出時
衆具莊嚴寶周普
譬如梵天處梵衆
勇猛精進不可稱
功德深廣無所依
萬種咸備修供養
精異華鬘上寶蓋
所爲求此三摩提
開示世諦令人知
汝當隨順智無礙
帝釋佐天三十二
求彼三昧亦復然
威儀寂靜功德圓
彼求三昧亦如是

又如醫王處世間
隨順諸佛清淨心
譬如雪山諸山王
亦如寶釐妙莊嚴
又猶鵠王統明白
如是諸佛金色身
無垢三昧淨智燈
彼除一切衆物想
諸垢消滅無瞋毒
若能觀は無自他
給施病者衆妙藥
初未曾離本空性
曄曄同於轉輪帝
彼見諸佛衆相滿
處空自在無礙遊
世尊眞子如斯念
能破大冥諸黑暗
念諸佛智無礙光
無明清淨妙智人
彼終無有諸色相

無疑惑中淨智生

悉能斷斯諸有見

亦已滅亡陰界想

聞法除惱得清涼

比丘當知諸佛子

及以清淨比丘尼

彼優婆塞優婆夷

若能念此得三昧

大方等大集賢護經卷第四

音釋

甕烏莖切豺士皆切燒而沼切隘烏懈切滌徒歷切

也瓦器也搗狼屬擊也替公戶切鵠胡沃切

名擊也鏗打也曄而無明曰曄于鬼切曄域輒切

鏗鏗口莖切鏘七羊聲也曄曄于鬼切曄光明盛貌

大方等大集賢護經卷第五

隋天竺三藏闍那崛多及笈多等譯

現前三昧中十法八法品第十三

爾時世尊復告賢護菩薩言賢護若有比丘樂欲修習此三昧者先當思惟彼無相思想既思惟已我慢不生賢護除慢高已心意泰然遠離眾相爾時即應為他宣說如是三昧不應起諍是中云何名為諍也所謂妄想誹毀即謗於空名為諍也賢護是故彼比丘以無諍故當能修學為他宣說此三昧也賢護有諸善男子善女人若欲修學為他解釋此三昧者應當

具足成就十法然後爲他解斯三昧何等爲十所謂
一者彼諸善男子善女人先摧我慢起恭敬心二者
知恩不忘心常念報三者心無倚著亦無嫉妬四者
除斷疑惑及諸障礙五者深信不壞繫念思惟六者
精進勤求經行無倦七者常行乞食不受別請八者
少欲知足調伏諸根九者正信甚深無生法忍十者
常念誰所有是三昧卽於彼師生諸佛想然後修習
如是三昧賢護是爲彼善男子善女人具足如上十
種法已應當修習如是三昧亦令他人受持讀誦如
是行者當得八事何等爲八一者畢竟清淨於諸禁

戒無毀犯故二者知見清淨智慧和合不與餘相應
故三者智慧清淨更不復受諸後有故四者施與清
淨不願一切諸行果報故五者多聞清淨旣聞法已
畢竟不忘故六者精進清淨於一切時求佛菩提故
七者遠離清淨於一切名利不染著故八者不退清
淨當得阿耨多羅三藐三菩提初不動搖故賢護是
爲彼善男子善女人所獲八法也爾時世尊爲重明
此義以說偈曰

智人不起有相想 亦當除慢及我心
於深忍中無取著 彼能速宣此三昧

空中本來滅諍根
涅槃無相大寂定
於佛無嫌不謗法
彼能速宣此三昧
智者不興妒嫉意
念佛知恩及法僧
所生降伏無遷移
如是寂靜持三昧
無有嫉妬亦無疑
思惟深法真實信
精進不懈離諸欲
彼能如是得三昧
常行比丘乞食法
捨諸別請況求財
斷除垢染證真如
彼能如是得三昧
誰能有此三摩提
我應聽受廣流布
於教師所起佛想
彼能如是得三昧

若人修行此三昧
當具功德超世間
彼應速受八種法
稱諸佛心淨無垢
持戒清淨無有邊
三昧菩提及勝見
彼能清淨諸有中
住以最妙功德聚
智慧清淨不受有
布施離垢入無爲
得彼多聞未曾忘
其爲智人功德藏
勇猛精進得菩提
於世名利不貪染
若諸智者善行此
彼入無上深妙禪
不共功德品第十四

爾時世尊復告賢護菩薩摩訶薩言賢護彼諸菩薩

摩訶薩復當成就十八不共法何等名爲不共法也
所謂如來初成阿耨多羅三藐三菩提乃至般涅槃
於其中間如來所有三業智慧爲首一切身業隨智
慧行一切口業隨智慧行一切意業隨智慧行又諸
如來知見過去無有障礙知見未來無有障礙知見
現在無有障礙又諸如來所爲無有錯謬言無漏失
意無妄念無別異想常在三昧無不知已捨又諸如
來意欲無滅精進無滅禪定無滅智慧無滅解脫無
滅解脫知見無滅賢護是爲如來十八不共法彼菩
薩摩訶薩當應修習具足成滿復次賢護若菩薩摩

訶薩成就具足甚深難見攝受正法卽欲宣說是三
昧者應當更受十種勝法何等爲十所謂如來十力
云何十力賢護是中如來是處非處力者如來於諸
處非處事能以正智如實知故賢護如是處非處事
如來能以正智如實知者此則如來處非處力如來
得此力已知真實處於大衆中作師子吼轉大梵輪
昔所未轉若有沙門婆羅門若天若梵若魔若人一
切世間終無有能如是轉者賢護是爲如來第一智
力菩薩摩訶薩應當修學具足成滿復次賢護是中
如來一切至處道力者如來於一切處道差別皆以

正智如實知故賢護如是一切至處道事如來能以
正智如實知者此則如來至處道力也如來得此力
已知真實處於大眾中作師子吼轉大梵輪昔所未
轉若諸世間沙門婆羅門若天若梵若魔若人終無
有能如是轉者賢護是爲如來第二智力菩薩摩訶
薩應當修學具足成滿復次賢護是中如來世間種
種界力者如來於世間種種界無量差別能以正智
如實知故賢護如是世間種種界事如來皆以正智
如實知者此則如來世間界力也如來得此力已知
真實處於大眾中作師子吼轉大梵輪昔所未轉若

諸世間沙門婆羅門若天若梵若魔若人終無有能
如斯轉者賢護是爲如來第三智力菩薩摩訶薩應
當修學具足成滿復次賢護是中如來心行力者如
來於諸衆生種種心行無量差別皆以正智如實知
故賢護如是衆生種種心行無量差別如來能以正
智如實知者此則如來知心行力也如來得此力已
知真實處於大眾中作師子吼轉大梵輪昔所未轉
若諸世間沙門婆羅門若天若梵若魔若人終無有
能如是轉者賢護是爲如來第四智力菩薩摩訶薩
應當修學具足成滿復次賢護如來知衆生諸根差

別力者如來於衆生諸根種種差別皆以正智如實
知故賢護如是衆生諸根種種差別如來皆以正智
如實知者是則如來諸根差別力也如來得此力已
知真實處於大衆中作師子吼轉大梵輪昔所未轉
若諸世間沙門婆羅門若天若梵若魔若人終無有
能如是轉者賢護是爲如來第五智力菩薩摩訶薩
應當修學具足成滿復次賢護是中如來禪定力者
如來於一切禪定解脫三昧生起煩惱及以滅除斯
以正智如實知故賢護如是一切禪定解脫三摩跋
提生起煩惱乃至清淨如來皆以正智如實知者是

則如來禪定力也如來得此力已知真正處於大衆
中作師子吼轉大梵輪先所未轉若彼世間沙門婆
羅門若天若梵若魔若人終無有能如是轉者賢護
是爲如來第六智力菩薩摩訶薩應當修學具足成
滿復次賢護如來業力者如來於彼一切諸業種種
差別及彼未來和合得報亦無量差別如來斯以正
智如實知故賢護如是諸業種種差別未來得果亦
復差別如來皆以正智如實知者斯則如來知業力
也如來得已知真實處於大衆中作師子吼轉大梵
輪先所未轉若彼世間若沙門婆羅門若天若梵若

經
魔若人終無有能如斯轉者賢護是爲如來第七業
力菩薩摩訶薩應當修學具足成滿復次賢護如來
天眼力者如來常以清淨天眼過於人眼見彼未來
諸衆生輩死此生彼其所受身或美或醜或善或惡
所得諸色或好或惡或妙或麤或生善道或生惡趣
又見衆生所作諸業或善或惡有諸衆生具身惡業
具口惡業具意惡業訶罵聖人誹謗正法壞和合僧
具足如是諸惡業故身壞命終生於惡道又諸衆生
具身善業具口善業具意善業恭敬聖人尊重正法
供養衆僧具行如是諸善業故命終得生人天善趣

如是等事皆如實知賢護如來以淨天眼見諸衆生
死此生彼乃至命終生於天上是則如來生死智力
得是力已知真實處於大衆中作師子吼轉大梵輪
昔所未轉若彼世間若沙門婆羅門若天若梵若魔
若人終無有能若斯轉者賢護是爲如來第八智力
菩薩摩訶薩應當修學具足成滿復次賢護如來宿
命智力者如來能以諸宿命智知於過去諸宿命事
所記衆生生此死彼或於一處初受一生或二或三
或五或十或百或千乃至或受無量百生無量千生
無量百千生如是乃至無量轉劫無量定劫無量轉

不轉劫等皆如實知又於彼所生趣如是處如是家如是種姓如是名字如是相貌如是生中如是服食如是所作如是善惡如是憂喜如是苦樂乃至若干壽命等亦如實知又於某處捨彼身已復生某處如是身相如是所說如是所經乃至壽命諸過去事皆悉知故賢護如來能以種種無量諸宿命智知彼眾生宿命所經始自一生及無量生乃至壽命諸過去事如實知者是則如來宿命智力也得是力已處大眾中作師子吼轉大梵輪昔所未轉若彼世間沙門婆羅門若天若梵若魔若人終無有能若斯轉者賢

護是爲如來第九智力菩薩摩訶薩應當修學具足成滿復次賢護如來漏盡力者如來能盡一切諸有無復諸漏心慧解脫自覺法已是故唱言我生已盡梵行已立所作已辦不受後有賢護如來如是能盡諸漏心慧明脫自證知故故言我生已盡乃至不受後有如實知者是則如來漏盡智力也如來得已處大眾中作師子吼轉大梵輪昔所未轉若彼世間沙門婆羅門若天若梵若魔若人終無有能若斯轉者賢護是爲如來第十智力菩薩摩訶薩當應修學具足成滿賢護若諸菩薩摩訶薩讀誦受持思惟修習

是三昧者則能攝受如來十力也爾時世尊爲重明此義以偈頌曰

十八不共等覺法

十力明智諸佛同

菩薩修習此妙禪

自然成就斯二種

隨喜功德品第十五

爾時世尊復告賢護菩薩言賢護若菩薩摩訶薩具足成就四隨喜故卽當得斯現前三昧速疾成滿阿耨多羅三藐三菩提何等名爲四種隨喜也所謂彼菩薩摩訶薩應作如是念如彼過去一切諸如來應供等正覺各於往昔行菩薩時皆因隨喜得是三昧

因三昧故具足多聞由多聞故速疾成就阿耨多羅三藐三菩提如我今日亦應如是依因隨喜得是三昧因三昧故具足多聞由多聞故速得成就無上菩提賢護是爲菩薩摩訶薩第一隨喜功德聚也賢護彼菩薩摩訶薩復應如是念如彼當來一切諸如來應供等正覺行菩薩時皆因隨喜得是三昧因此三昧故具足多聞由多聞故速疾成就阿耨多羅三藐三菩提如我今日亦應如是當因隨喜得是三昧歸憑三昧求滿多聞由多聞故速疾成彼無上菩提賢護是爲菩薩摩訶薩第二隨喜功德聚也賢護是菩

薩摩訶薩復應如是念而今現在無量無邊阿僧祇諸世界中一切諸如來應供等正覺各於往昔行菩薩時亦因隨喜得是三昧因是三昧具足多聞由多聞故現皆得成無上菩提然我今日亦應隨喜乃至爲欲速成無上菩提故賢護是爲菩薩第三隨喜功德聚也復次賢護彼菩薩摩訶薩復應如是念我今已得仰學三世一切諸如來本於過去行菩薩時皆因隨喜得是三昧皆因三昧具足多聞皆由多聞而得成佛今我以此隨喜功德願與一切衆生共之同生隨喜同獲三昧同具多聞同悉成就阿耨多羅三

藐三菩提賢護是爲菩薩摩訶薩第四隨喜功德聚也復次賢護而彼菩薩既得成就如是隨喜如是三昧如是多聞如是速疾成就菩提以是功德悉與衆生共同回向阿耨多羅三藐三菩提如是功德難可稱量我今爲汝略開少分汝宜諦聽善思念之賢護譬如有人定壽百歲身輕氣猛行駿若飛是人人便卽能行一世界先行東方盡世界邊如是次第行於南西北四維上下周旋十方窮極地際賢護於意云何假使有人聰明出世善通算術能計是人所行地界道路近遠長短耶賢護白言不也又能稱量耶不

也又能觀察耶不也亦能思維耶不也世尊賢護且置初行卽使是人滿足百年速疾往返徧至十方無量世界彼明算人復能知不賢護報言不也世尊彼明算人尚不能知初時所行地界近遠云何能計是人一世盡力飛行周徧十方無數世界道路由旬其數多少若欲的知惟獨世尊及大弟子舍利弗與彼不退諸大菩薩等乃能知耳佛告賢護如是如是我今語汝若有善男子善女人起信敬心於彼風行壯人所經世界盛滿珍寶持用奉獻十方諸佛其所獲福雖曰極多然尚不如隨喜三昧功德少分何以故

賢護由彼菩薩摩訶薩修此三昧具足如上四大隨喜回向阿耨多羅三藐三菩提爲求多聞成正覺故賢護以是因緣持此施福望前隨喜所獲功德百分不及一百分不及一百分不及一億百分不及一乃至算數譬喻所不能及賢護汝今當知諸菩薩等隨喜回向所得功德是故我今更爲汝說菩薩隨喜功德少分汝宜諦聽也賢護我念往昔過去無量無邊阿僧祇劫爾時有佛號師子意如來應供等正覺明行足善逝世間解無上士調御丈夫天人師佛世尊出現於世賢護時此世界閻浮提中人民熾

盛多饒財寶豐樂安隱甚可愛樂賢護爾時此閻浮提其地弘廣具足一萬八千由旬其間城都聚落乃有一萬八千一切皆以七寶所成其城縱廣十二由旬於諸城內城外皆有九十億民家賢護爾時大城名曰寶作城中居民有六十億彼城卽是師子意如來現生處也賢護爾時師子意如來初會說法有九十億人證阿羅漢果過七日已於第二會復有九十億人得阿羅漢果過第二會第三會中復有九十億人得阿羅漢果過三會已復有九十億人咸從他方而來大集悉是清淨諸菩薩衆自後彼佛恒有無量

阿僧祇諸聲聞衆賢護爾時人民行十善業如彼未來彌勒佛世教諸衆生具足成就十種業行爾時人壽八萬四千如彌勒時人壽無異賢護時彼大城有轉輪王名曰勝遊如法治世具足七寶所謂金輪寶象寶馬寶摩尼寶女寶長者寶主兵寶是爲七寶滿足千子身相端嚴成就威雄降伏怨敵彼王所統盡世界邊不用刀兵亦無威迫無所稅斂衆具自然時勝遊王詣師子意如來應供等正覺所頂禮尊足然後退坐爾時師子意如來知勝遊王渴仰心已卽爲廣宣現前三昧彼王旣聞如是二昧深自慶幸發隨

喜心以一把寶奉散佛上彼王緣此隨喜善根命終
之後還生閻浮爲彼王子名曰梵德復紹王位如法
治化彼佛滅後於正法中有一比丘其名曰寶聰明
精進常爲四衆宣揚廣說如是經典賢護爾時彼梵
德王於比丘所聞三昧已得深淨信起隨喜心持上
妙衣價直百千覆比丘上賢護又梵德王從比丘所
聞三昧已卽發阿耨多羅三藐三菩提心爲愛法故
捨家出家剃除鬚髮披服袈裟是時亦有百千人衆
成就信心卽隨彼王法服出家亦爲如是三昧經故
時彼梵德比丘與彼百千諸比丘衆經八千歲供養

承事彼寶比丘無有疲倦終不能得如是三昧惟除
一聞聞已隨喜具以四種隨喜功德回向阿耨多羅
三藐三菩提如初隨喜如是廣行然彼梵德比丘及
百千衆緣此善根尋得值遇六萬八千諸佛世尊凡
所生處常得爲衆頌宣廣說如是三昧彼王比丘因
彼善根復更值遇六萬八千億數諸佛如是次第種
諸善根得此三昧具足圓滿助菩提法已尋得成就
阿耨多羅三藐三菩提號曰堅固精進如來應供等
正覺明行足善逝世間解無上士調御丈夫天人師
佛世尊而彼百千諸比丘衆得此三昧亦能成就助

道法故皆已成於阿耨多羅三藐三菩提名曰堅勇
如來應供等正覺復令無量百千衆生住於阿耨多
羅三藐三菩提賢護彼但耳聞尚獲如是何況菩薩
聞受三昧讀誦憶持爲他廣說復勤思行而不得也
賢護以此義故諸菩薩等聞是三昧誰不隨喜誰不
讀誦誰不受持誰不修習誰不廣說何以故賢護以
彼菩薩聞是三昧卽得成熟助道法等速疾成於阿
耨多羅三藐三菩提故賢護以是因緣吾今語汝若
人正信淨心欲求阿耨多羅三藐三菩提者要先至
心求此三昧菩薩若聞百由旬內有此甚深三昧經

者菩薩卽應躬自往詣聽是經典聞已卽應讀誦受
持修習思惟爲他廣說賢護且置百由旬內當往聽
受又彼菩薩若聞二百由旬三百四百五百乃至千
由旬內有是三昧在某都城某聚落所菩薩卽應躬
往聽受習誦受持何以故賢護以是菩薩清淨信心
爲求成就阿耨多羅三藐三菩提故是故菩薩不應
起懈怠心生懶惰心起散亂心當更發精進心發猛
利心應當爲是三昧速至于由旬所乃至但得聞是
三昧何況讀誦受持思惟解說何以故賢護以是三
昧能攝一切助道法故復次賢護是中若有菩薩以

純淨心爲求菩提應當往詣千由旬所爲聽如是三昧法時菩薩應當承事供養彼說法師一切衆具悉皆奉上常當隨逐法師而行或時一年或復二年或十二十或經百年乃至盡壽隨逐法師不得捨離乃至但求聞是三昧何況能得讀誦受持思惟義理爲他解釋如是菩薩隨法師時當捨自心諸所爲事常當隨順彼阿闍梨法師意行謹心承事不得違教起尊敬心及重愛心除捨一切無愛敬事於法師所發善知識想乃至當起如諸佛心賢護彼菩薩於是法師阿闍梨所能生如是敬愛心已若當不得讀誦受

持思惟廣說乃至聽聞是三昧者終無是事惟除往昔誹謗如是甚深經典業時已熟定墮惡道業不淨耳復次賢護假彼菩薩或欲須離彼法師者常當知恩常當念恩常當報恩何以故賢護以是法師宣講因緣令斯經典久住不沒復次賢護若有菩薩爲是三昧尚當應往千由旬處況復隨近城都國邑聚落空處或山野中而當不往聽受讀誦思惟義理爲他廣說也復次賢護我今語汝若有菩薩爲三昧故即能往至千由旬所乃至不得聞是三昧而彼菩薩雖復不得聞是三昧於是法中念求善根當發精進莫

卽解脣汝應當知如是之人則爲已得不退轉於阿
耨多羅三藐三菩提何況聽聞受持讀誦思惟修習
爲他廣宣賢護汝今當觀彼菩薩輩聞此三昧已而
能受持思惟修行卽得爾許大功德聚乃至求已不
退轉地畢竟成就阿耨多羅三藐三菩提何況聞已
讀誦受持思惟修習廣爲他說亦令多人聞已誦持
修習思惟熾然流布也爾時世尊爲重明此義以偈
頌曰

我念過去有如來

號師子意人中天

彼時有王爲衆首
時大智土得聞已
以手持寶奉散之
內心思惟發是言
爲諸世間作饒益
時王興建此業已
尋得值遇寶比丘
彼聞比丘善說時
卽以勝妙衆寶服
復與數千衆出家

親往詣佛求三昧
歡喜徧滿不可宣
供養人尊師子意
我今歸依無上覺
唯願善說三摩提
捨身還生於彼宮
大德名聞滿十方
心生歡喜無稱量
蓋彼比丘爲菩提
供養承事彼比丘

經歷滿於八千歲 爲求如是三昧故
彼惟一說不再宣 聞受深妙如大海
爾時心智都無倦 求此如實勝寂禪
彼輩如是修行已 值遇諸佛大威雄
具滿六萬有八千 其間亦聞此三昧
餘世供養復承事 六萬八千億世尊
所聞深妙悉隨喜 斯由師子如來故
彼王如是具修行 終得成佛號堅勇
教化衆生無量數 所在生死皆遠塵
從王出家數千衆 亦同得佛名堅勇

德聲徧滿於十方 聞三昧名證大覺
何況復能爲他說 不染著彼諸世界
當更廣顯妙思惟 若斯三昧諸佛演
若知三昧自由句 爲求菩提詣彼聽
於言教中莫辭倦 聞者功德不可量
若至於彼不得聞 尚獲若干諸福聚
何況聞已思說者 唯當速求此三昧
當念彼具梵德人 親近承事勿生厭
誰比丘所有此經 卽當詣彼修供養

覺寤品第十六

爾時世尊復告賢護菩薩言賢護我念往昔過多無量阿僧祇劫有佛出世名薩遮那摩如來應供等正覺十號具足時有比丘名曰和輪於佛滅後稱揚廣說是三昧經我於爾時爲大國王一心專求是妙三昧卽於夢中聞有告言是三昧處旣覺寤已遂便躬詣比丘師所求是三昧因請法師剃髮出家爲求聽受是三昧故躬用承事和輪法師備經三萬有六千歲天魔障蔽竟不得聞時佛復告諸比丘比丘尼優婆塞優婆夷言我今語汝汝等當應急疾聽受是三昧王無得吝進亦無忘失善承事師無令失所求是

三昧以得爲期若經一劫乃至百千不生懈心無不得也賢護若人一心求是三昧常隨逐師不得遠離當設供養所謂湯藥飲食衣服牀敷種種衆具及以一切金銀珍寶凡是資用盡奉於師無所愛惜如其自無乞求而與趣得三昧勿生厭心賢護且置如斯尋常供具夫求法者師若有須乃至應當自割其身肌膚股體供奉於師師若須命尚無愛惜況餘外物而不奉師賢護其求法者承事法師將護隨順其事若此又承事師如奴隨主如臣事君事師亦爾斯人如是疾得三昧得三昧已當念憶持常念師恩恒思

報答賢護是三昧實不易可聞正使有人過百千劫
但求聞名尚不得聞何況聞已書寫誦持轉復爲他
分別說也賢護假使恒河沙數諸佛世界盛滿珍寶
持以行檀其福雖多猶亦不如聞此經名爾時世尊
爲重明此義以偈頌曰

我念過去無量時 具足數滿六萬歲
常隨法師不暫捨 初不聞是三昧名
有佛厥號爲至誠 時彼比丘名和輪
其於世尊滅度後 比丘廣說是三昧
我時爲比天下王 夢中聞告三昧處

和輪比丘常宣轉 王當聽受是妙經
從夢寤已卽推求 躬詣比丘請三昧
遂捨王位而出家 恭敬供養不暫休
經歷三萬六千年 但願後逢彼宣流
常爲天魔來困擾 終竟未果一聽聞
是故比丘比丘尼 諸優婆塞優婆夷
吾故誠汝此誠言 汝當趣持是三昧
其欲敬承彼法師 若經一劫及多劫
備奉藥湯諸妙膳 求聞如是三昧經
又辦億數衆衣服 牀敷燈燭及諸珍

精勤如是不覺疲
爲聽如是妙三昧
比丘自無當乞奉
乃至身命無恪惜
何況餘物有惜心
如是求者得三昧
受恩常念思報恩
智人聞已應廣說
億那由劫專精求
斯妙三昧爾乃聞
假使恒沙諸世界
盛滿珍寶用行檀
能於是中說一偈
此人功德過於彼
正言宣說一偈者
過於諸劫那由他
何況聞已能廣傳
斯人功德不可說
若人樂行於菩提
當爲一切求是法

必能正覺無上道

聞已安住斯定中

囑累品第十七

爾時世尊告賢護菩薩言賢護是故彼善男子有淨
信者常當精勤聽此三昧旣聞受已讀誦總持思惟
其義廣爲世間分別演說宜善書寫安置藏中所以
者何賢護於我滅後當衆之世有諸菩薩摩訶薩輩
淨信心者爲衆生故當求多聞求多聞故當詣諸方
聽受正法賢護是故彼諸善男子有欲樂者具足信
心者攝受正法者愛樂正法者總持修多羅者爲如
是等廣宣說故以如來力加持故書寫如是大乘經

典以如來印印封之已然後安置於匣藏中賢護是
中何等爲如來印所謂一切諸行無造無作無造作
者未曾有無爲無相無想無依無禪無取無住一切
諸行盡苦因盡有盡一切煩惱盡無生無滅無道無
道果一切諸聖無有覆藏愚癡所毀智者所稱巧者
能受如來世尊說此經時無量衆生皆於阿耨多羅
三藐三菩提種諸善根恒河沙等諸佛世界有無量
阿僧祇諸菩薩摩訶薩衆皆從本國發來至此咸爲
聽受是三昧者彼輩皆得不退轉於阿耨多羅三藐
三菩提此三千大千世界一切大地六種震動所謂

動大動等徧動踊大踊等徧踊起大起等徧起震大
震等徧震吼大吼等徧吼覺大覺等徧覺乃至邊踊
中沒中踊邊沒時此世界如是大動爾時世尊告尊
者摩訶迦葉尊者舍利弗尊者目犍連尊者阿難及
賢護菩薩寶德離車子商主長者星德長者子偉德
摩納水天長者等五百人衆并餘諸天世人四部衆
等言迦葉我今以是三大阿僧祇劫修成阿耨多羅
三藐三菩提法付囑汝等如是等義一切世間所不
能信何以故如來所說修多羅最勝微妙第一甚深
於當來世能與一切衆生阿耨多羅三藐三菩提是

故我今慇懃囑汝汝當聽受汝當讀誦汝當憶持汝當思惟汝當修行汝當開發汝當廣宣汝當解釋汝當盡善汝當流布勿令斷絕復此阿難若有諸善男子善女人念欲修習此三昧經者欲讀誦者欲受持者欲思惟者欲開示者欲廣說者當應令他生正信故令他讀誦故令他受持故令他思惟故令他開示故令他廣說故我今爲彼安住大乘諸善男子善女人輩廣開發已當如是學常當念我如斯教敕爾時世尊說是經已尊者摩訶迦葉舍利弗大目犍連阿難自餘一切諸大聲聞及彼賢護寶德善商主星德

偉德水天長者等五百優婆塞眾及彼從十方他佛國土諸來菩薩摩訶薩眾乃至一切天龍鬼神人非人等彼聞如來說皆大歡喜奉教修行

大方等大集賢護經卷第五

音釋

跋北未切

縱廣縱即容切廣古曠切南北曰縱東西曰廣

股公戶切

匣胡來切

偉于鬼切



經

大方等大集賢護經卷第五

三二

浙江嘉興府楞嚴寺般若堂庚子年餘貲刻此
賢護經第五卷計八千三百字
該銀三兩八錢七分
順治十七年 月 日 徑山比丘徹微印開識



ホノ七

0
1
2
3
4
5
6
7
8
9
200
1
2
3
4
5
6
7
8
9
210
1
2
3
4
5
6
7
8
9
22